



हमारी चिट्ठी

गढ़वाली साहित्य, समाज अर सृजन को दस्तावेज
अंक :1 वर्ष :2 अक्टूबर-दिसम्बर 2006, सहयोग :20 रु०

चिट्ठी परिवार

सम्पादक

मदन मोहन डुकलाण

सह-सम्पादक

आशीष सुन्दरियाल

संचालन

रानू बिष्ट

सहयोग

देवेन्द्र प्रसाद जोशी

डॉ. सुनील कैथोला

प्रचार-प्रसार

रमेन्द्र कोटनाला

कुलानन्द घनसाला

आवरण चित्र

डॉ० सुनील कैथोला

(लाता गौं मा विखौति पर पत्तर नृत्य)

ये अंक मा ...

लोकगीत	:		2
हमारि बात	:		3
खोज-खबर	:	बादयूं का स्वांग, जनान्यू स्वांग...../भीष्म कुकरेती	5
छर्वी-बत्त	:	ग्लोबलाइजेशन का दौर... /आशीष सुन्दरियाल	14
बात-विचार	:	गढ़वाळि भाषा का विकास.... /दर्शन सिंह रावत	15
आज-ब्याळि	:	आर्केस्ट्रा का घपरोल मा.... /सुलोचना परमार	17
ननि कथा	:	माँ की टक्क/गजेन्द्र नौटियाल	19
सच्चो-किस्सा	:	गजानन्द टोपी अर..... /बालेन्दु बड़ोला	20
कविता	:	गिरीश सुन्दरियाल/विजय कुमार 'मधुर' विजयेन्द्र कुमाँई/चिन्मय सायर राकेश भट्ट की कविताएं	22
गीत	:	पाणी चौछवड़ि पाणी.../मदन मोहन डुकलान	25
	:	आज को जागर/ नेत्र सिंह असवाल	
पुराणि कलम	:	दीवो/स्व. चक्रधर बहुगुणा	26
साक्षात्कार	:	जीत सिंह नेगी/आशीष सुन्दरियाल	27
व्यंग	:	बीच-बीचा/नरेन्द्र कठैत	29
	:	घळचाघण्ड/प्रीतम अपच्छ्याण	31
इर्थे-उर्थे	:	मुम्बई मा गढ़वाळि रंगमंच/गजेन्द्र,दिनेश	32
साहित्य	:	बागी उप्पन की लडै/क.ला. डंडरियाल	33
चखन्यौ	:	र्यखड़ा/भीष्म कुकरेती	34

Lokel| izlk'kl enu elgu Mqlyk k
}kj k
, &16| j{ki g e~ /y kMi g 1/2 i k V jk i g
ngjknw&248008| Qkni& 2788748 cVs
izlk' k vj
ow|kqs
1 e; &l k; *1
15 QkyrwykbZ ngjknw cVsefnrA

ई-मेल : chithee@rediffmail.com

वेबसाईट : www.angwal.org

l nL; rk

l kykuk

vkt hou

l lFlkxr

100@&#I; k

1000@& #I; k

2000@& #I; k

लोक गीत

मांगल

पैलि न्यूते पैलि न्यूते, बेदमुखी बरमा
आज चैन्द बरमा जी को काज।
तब न्यूते तब न्यूते औजी को बेटा
आज चहीन्दा बढै को काज।
आज मैन न्यूति याले हल्दानू बाड़ी
आज चहीन्दा हल्दी को काज।
आज मैन न्यूति याले फूलों की डाळी
आज चहीन्दा फूलों को काज।
आज मैन न्यूति यालिन मंगळ्यानी नारी
आज चहीन्दा मांगळु को काज।
आज मैन न्यूति याले जुंडि-पुंडि गाई
आज चहीन्दा गोबर को काजा।
न्यूति याली न्यूती मैन सट्ट्यों की बाड़ी
आज चहीन्दा मोतियों को काज।

हमारि चिट्ठी


गढ़वाळि त्रैमासिक

गढ़वाळी भाा साहित्य को समग्र विकास

एक पहल एक प्रयास



पांडा का अड़यां अर वबरा का सट्ट



पांडा का अड़यां अर वबरा का सट्ट - या पुराणि मसल गढ़वाळि लिपि निर्माण का सिलसिला मा बिल्कुल फिट बैठद। जनकि राज्य बणणा बाद पहाड़ का साहित्य, समाज अर संस्कृति से जुड़यां लोग आपस मा, इनो करा उनो करा - एक हैंका तै अड़ांदा रैगेन अर एक आदिम जैको गढ़वाळि भाषा से दूर-दूर तक क्वी सम्बन्ध नी छ, चंट बणिकै गढ़वाळि भाषा की अलग लिपि को स्वघोषित निर्माता त बणो हि छ - राज्यपाल जनी हस्ती का हाथों सम्मान तक ल्हीणा मा कामयाब ह्वेगे। अबि जबकि गढ़वाळि भाषा गाळ-ग्वीडों उगिड़ी विकास का बाटा मा ग्वाया लगौणी छ अर मानकीकरण को मुंडुरू अबि भि रीं भाषा का साहित्यकारों तै परेशान कनू छ इन मा यूं साब जी पर अलग लिपि बणाणै क्य आँतुरी ऐ, य बात समझ से परे छ। ये साब क्य यो नि जणदा कि कतनै भाषा इन छन जौंकी अपणी अलग लिपि नी छ वो देवनागरी लिपि मा हि पढ़ै-लिखे जांदन पर अपणा आप मा समर्थ अर समृद्ध भाषा छन।

जख तक गढ़वाळि भाषा को सम्बन्ध छ त गढ़वाळि भाषा अपणा-आप मा एक समृद्ध भाषा छ, आज न बल्कि सदियों बटे रीं भाषा मा साहित्य लिखे अर पढ़े जाणू छ। गढ़वाळि राजभाषा छै अर कतनै आदेश, आलेख, न्यायालय का निर्णय अर गजट प्रकाशन रीं भाषा मा उपलब्ध छन।

यख मा यो भि स्पष्ट कर्नो जरूरी छ जो लोग यो ब्वना छन कि गढ़वाळि लिपि बणाण को विरोध इलै हूणो छ कि या एक गैर-गढ़वाळि न् बणै वो सरासर भ्रम फैलाणो काम कर्ना छन, गढ़वाळि लिपि बणाण को विरोध तब भि हूंदों अगर यो क्वी गढ़वाळि बणोदो, हाँ! अगर क्वी चाहे वो गैर गढ़वाळि हो या गढ़वाळि वास्तव मा समर्पित भाव से गढ़वाळि भाषा का संरक्षण अर सम्बर्द्धन का वास्ता काम करद त गढ़वाळि, समाज वेतै जरूर सिर आँखों मा बिठालो, पर लिपि निर्माण जना वेतुका अर सिरप सस्ती लोकप्रियता हासिल कर्ण वला कामों की कड़ी आलोचना कर्नी जरूरी छ।

आज गढ़वाळि समाज का सब्बि लोगुं की जिम्मेदारी छ कि वो गढ़वाळि भाषा तै विभ्रंशित अर नयी पीढ़ी तै भ्रमित कर्ण वळा इना कामो का खिलाफ अगनै आवन अर यूं लोगों की कड़ि भर्त्सना करीन्।

सरकार (किलैकि सरकार भि समाज को हि हिस्सा छ) को भि दायित्व छ कि वो इन कामों तै बड़ावा न दे अर भविष्य मा गढ़वाळि भाषा साहित्य अर संस्कृति से जुडयां कै भि काम मा गढ़वाळि



बकल & चोक्य ध
गकनड 'कककुकककक नकनड'

ढुणडेशकर महादेव पर्यटन विकास समिति, उत्तराखणड

शेमगढ ढुणडसिर कडाकोट, ब्लोक कीर्तिनगर,
टिहरी गढवाल, उत्तराखणड

अध्यक्ष

जितेन्द्र पंवार

मो.- 9358136362

उपाध्यक्ष

मकान सिंह राणा

मो.- 9412304467

कोषाध्यक्ष

महिपाल पंवार

मो.- 9719342929

सचिव

धनवीर रावत

मो.- 9412149307

ग्रुप कार्यालय एवं पजाचार :

यसि दे; कुडसकु 11 खकमु दकनड
फु;ज वसु जलवसु दकनड
नकनड % 101351&2631996



बाद्यूं स्वांग, जनान्यूं स्वांग अर भरत कु नाट्यशास्त्र

✍ भीष्म कुकरेती

हिंदी फिल्मों का चरित्र अभिनेता स्वर्गीय सज्जन कुमार न् अपणी किताब “भरत नाट्यशास्त्र मा रससंपादन” की भूमिका मा ल्याख बल हिंदुस्तान मा नाटक सिखांद दें नाटक शिक्षा प्रबंधन का बुबा सुकरात तैं माने जांद, पण (सज्जन कुमार को सही हिसाब से) असल मा नाटक शिक्षा प्रबंधन का असली अर सबसे पैली किताब च भरत की “नाट्यशास्त्र।” नाट्यशास्त्र तैं पंचम वेद बुले जांद। ये बड़ा पोथा मा नाटक मा क्या-क्या होण चयांद सबि कुछ च। इखमा सबसे अहम पाठ च नाटक मा रससंपादन अर भावुं से नाटक मा नाटकीयता लहाणो, यांका अलावा पंचमवेद (नाट्यशास्त्र) मा नाट्य लेखन, नाटक का प्रकार, चरित्र-चित्रण, वेश-भूषा, गैणा, समय-काल, स्थान-जगा, जाति कु वर्गीकरण, वाचकता, दर्शक भेद, भाषा-भेद, अंग भेद, मंच विधि नाटक सूचना की अपरोक्ष विधि, याने कि नाटक का हरेक कूप्या, बिंदु पर सविस्तार चर्चा च। नाटक कु कवी बि अंग अणभिड्यूं नी च।

सुकरात या निरंतर विकासवादी पुस्तक” दि ऑक्सफोर्ड कम्पेनियन टू दि थियटर ऐंड दि ऑक्सफोर्ड कम्पेनियन टु इंगलिश लिटरेचर’ या निकौल की वर्ल्ड ड्रामा, ब्रिटिश ड्रामा, दि डेवलेपमेण्ट आफ थियेटर, हिस्टरी आफ क्रिटिसिज्म या इथगा सालुं मा ‘ड्रामा’ मैगजीनुं मा लिख्यां लेख या भारत मा नाटकू पर लिख्यीं आलोचना कुछ नी च बल्कण मा भरत को नाट्यशास्त्र को आधुनिकीकरण ही च। बस भाषानुवाद या भाषाभावना मा ही बदलाव च। हिंदी मा जू बि आलोचना नाटकू पर लिख्याण पी च वा जादातर अंग्रेजी या साम्यवादी विचारधाराऊं की ही नकल च अर दगड़ मा कुछ मौलिक समीक्षक बि ताणि मारण ा छन। भरत कु नाट्यशास्त्र असल मा ‘कम्पलीट’ या संपूर्ण च इलै इ अबि बि प्रासंगिक च।

भरत अर गढ़वाळ बादी :- नाट्यशास्त्र का रचयिता भरत तैं माने जांद। अर इन माने जांद बल नाट्य शास्त्र की रचना एक

विद्वान न नि कार बल्कण मा भौत सा विद्वानुं को संग्रह च, असल मा पैल नाटककार अर नाट्य शास्त्री तैं भरत बुले जांद छौ। त नाट्यशास्त्र भौत सा भरतू को काम च। ठीक च इख मा छ्वीं या घपरोळ की जगा नी च।

अब आंदो मि असली मुद्दा पर, गढ़वाळ मा जू बादी जात च वा जात भरतवंशी जात च, हालांकि बादी भरत शब्द को अपभ्रंश नी च पण बादी जात भरत वंशी जरोर च, इख मा मै तैं कवी शक की गुंजायश नि दिख्यांदी, तीन हजार साल पैल नाटककार, नाटकशास्त्रयूं सणि भरत बुले जांद छौ। अब भारत की कै बि भाषा मा नाटकशास्त्रयूं सणि भरत नि बूले जांद, अलग-अलग लोक भाषीं मा भरत को रूपान्तर ह्वे ग्ये। गढ़वाळ मा बादी स्वांग कार या स्वांग शास्त्री ह्वेगेन। भगवान शिवजी तैं नाटक को स्त्रोत्री दिवता माने जांद। भरत शिव भक्त होंदा छ। बादी बि शिव भक्त छन अर इन माने जांद कि बादी शिवजी का मैल से पैदा ह्वेन। म्यार कौलेज का दगड़्या प्रोफेसर गणेश सती ‘गणी’ की किताब बादी-दि फ्लावर्स ऑफ शिवा’ मा यों पर पूरो वृतांत च। यीं किताब मा बाद्यूं की परेशान्यूं पर ही जोर छौ। सती जी मसूरी मा असंगठित मजदूरुं का नेता छ त यीं किताब मा बाद्यूं स्वांग पर जादा कुछ नी लिखे ग्ये। हां! लोगु स्वांग मा अरुचि शुरू होण से बाद्यूं की परेशानी पर चित्रांकन जादा ह्वे।

लिख्यूं गढ़वाळी साहित्य मा बाद्यूं पर जु साहित्य मिल्लो वु काव्यात्मक (गीतु) साहित्य पर जादा मिल्लो। डॉ० शिवानंद नौटियाल, डॉ० चातक, डॉ० बाबुलकर, केशव अनुरागी, डॉ० ढौंडियाल या श्याम बुक डिपो (मि यीं. प्रकाशन संस्था तैं एक अभिनव, आदरणीय चिरस्मरणीय संस्थान माणदो) डॉ० सेमल्टी (वाद्य यंत्र) जन मनीषियुं बाद्यूं पर जू बि ल्याख वु जादतर बाद्यूं गीत, ढौळ, बजाण वळा यंत्रु पर ही ल्याख, काव्यात्मक शैली या रोचकता होंद त गीतु पर चौतर्फा आकर्षण होंद अर



यां से बाद्युं स्वांग-नाटक धर्मिता अणभिड्युं रै ग्ये। जन-जन गढ़वाळ मा लिख्युं साहित्य वृद्धि ह्वे तन-तन बाद्युं कीमत मा बि गिरावट ऐ। बाद्युं जु असली महत्त्व छै वु छै स्वांग भरण या स्वांग खिलण वु स्वतंत्रता आंदोलन अर स्वतंत्रता उपरांत कम ह्वे त यां से बि नजर मा बाद्युं स्वांग पैथर ह्वे ग्ये। नया-नया संचार माध्यमूं न बि स्वांग विधा तैं पैथर धस्काई।

बचपन मा मिन बाद्युं स्वांग देखिन अर अपण गौं जसपुर, ग्वील, मित्रग्राम, सिलोगी अर देरादूण का कुछ गौं मा बाद्युं कथगा ही स्वांग देखिन अर जब मिन अब भरत कु नाट्यशास्त्र को अध्ययन कार त तब मैं सणि ज्ञान ह्वे कि बाद्युं ह्वांग मां भरत कृत नाट्यशास्त्र की पूरी लौ-छै रयीं चा। हाँ! बादी अपण नाटकूं मा सामयिकता त ल्हाणा रैन पण अशिक्षा व फटफटाक बदलाव को दबाब का कारण नाटक को पैनोरामा (वाह्य शिल्प अर दर्शकूं परसेप्सन मा बदलाव) मा बदलाव नि ल्हाै सकिन अर गढ़वाळ मा स्वांग वृति या नाटक विधा को आधुनिकीकरण रुकि ग्ये। गढ़वाळ का स्कूलूं मा ँ गिरेन्द्र वर्मा, उपेन्द्र नाथ अशक अर मोहन राकेश या विजय तेंदुलकर जना शहरउन्मुखी बादशाह बैठी गेन त स्कुल्या यूं शहयूं तैं अंगीकार त नि कौरि सकिन पण दगड्या दगड़ अपण माटा बणयां स्वांग वृति से भि वंचित ह्वे गेन। गढ़वाळी स्वांग कख्याक बि नि राई, अशक को “तौलिया” गौं जुगा नि छै त गौं कु सामायिक स्वांग गढ़वाळ का शिक्षातंत्र मा छयीं नि छै अर यां से गढ़वाळी नाटकूं पर दुतरफा मार पोड़ि।

भरत की चेली-गौं की जनानी :- भारत मा भरत कवी वीर्यजनित जाति नि छै बल्कण मा एक लोकजनित जाति छै। जु बि स्वांग से आकर्षित होंद छै वु भरत माने जांद छै, भरत लोक पूरक वृति छै अर यो ही कारण छै कि हमारा गढ़वाळ की जनानी बि स्वांग कर्मी छयी, गीतू मैनों मा बिट या शिल्पकार जनानी गीत लगाणा अलावा स्वांग बि खिल्दा छ। यि जनानी असल मा भरत की चेली छयी। यूं जानन्यूं तई कैन बि नाट्यशास्त्र की फौर्मल ट्रेनिंग नि दे ह्वेली पण आश्चर्य यो च यूं जानन्यूं तैं नाट्यशास्त्र को श्रुतिप्रधान ज्ञान अवश्य छै बाळापन मा जानन्यूं (बिट्ट अर शिल्पकार दुयी) का स्वांग दिख्यां छ अर जब भरत को नाट्यशास्त्र पौड़ त पाई कि हमारी जानन्यूं मा नाट्य विध ॥ को क्रमगत ज्ञान श्रुति विधान से होणु छै। अर आधुनिक

नाटकशास्त्री जन कि विजय तेंदुलकर, दिनेश ठाकुर, कारंत थपलियाल, राजेन्द्र धस्माना, शाह, जीत सिंह नेगी, एच.एस. रावत, मारजोरी बोल्टन, अगाथ क्रिस्टी, सत्यदेवी दुवे, नाट्य विधा तैं अपणादन उनि हमारी जनानी बि नाट्य विधा की ज्ञानी छयी। सिर्फ पैनोरामा को अंतर छै निथर मेरी ब्वे बि अपण समौ की नाटककार अर नाटक कलाकार इनी छै जन आज पृथ्वी थियेटर का कलाकार अर कृतिकार छन, मेरी गौं की वातौ ददि रद्दू इनी कलाकार अर कृतिकार छै।

नाटक-स्वांग पर समीक्षा :- मि अगवाड़ी की पंगत्युं मा जू बि समीक्षा लिखणू छैं गढ़वाळै बाद्युं अर गढ़वाळै जानन्यूं कृत गद्यात्मक स्वांग पर आधारित ह्वेकी लिखणु छैं। त ह्वे सकद इखमा साहित्यकता या फोकटिया सिवालिजाइजेशन मा कमी रै जाली अर मैं तैं इखमा कवी शरम ल्याज बि नी च।

जब दुख लचकद अर पुळ्याट उछाळि मारदो:- हौर साहित्यिक विधा अर नाटक या स्वांग मा एक मुख्य अंतर यो होंद कि स्वांग मा साहित्य हिटणु बि रौंद अर बचल्याणु बि रौंदु। कविता, कथा तैं पढ़ण पोड़द पण स्वांग मा भौतिक कार्यकलाप, ध्वनि, उज्यळू सबूं तैं दिखण पोड़द, पढ़ण मा अनुभव करण पोड़द पण नाटक-स्वांग मा अनुभव दिख्यांद बि च अर अनुभव तैं अनुभवित बि करे जांद। अनुभव करण अर अनुभव तैं हिदद, बैठद, बुलण स्वांगु मा हि संभव च।

म्यार गौं मा भरत की चेली यानी गौं की जनानी गीतूं मैना मा जूनी तौळ या चिमन्यूं उज्यळ मा स्वांग खिल्दा छ। एक स्वांग मैं तैं याद औंदु जख मा सासू क्रूर छै त ब्वारी मयळी। मी तैं अबि बि याद च जब सासू ब्वारी तैं धमकांदी छै या गाळी दींदी छै त ब्वारी स्वांग मा दुःख प्रदर्शन लचकण से कर्दी छै अर जब सासू ब्वारी की बड़ै करदी छै त ब्वारी इन हिटदी छै जन बुल्या कवी बाछी कुतकणी होवु। हमर गौं की जानन्यूं ल अलग-अलग रस-भावुं का वास्ता इन बिम्ब खुजेन कि पढ़यां-लिख्यां नाटककर्मी खौळे जाला कि यूं अनपढ़ जानन्यूं तैं कैन सिखे होलु कि नाटकूं मा अनुभव तैं हिटण पोड़द। नाटकूं मा श्रव्यता अर दृष्यता को मिलाप होण चयांद, हमारी बादी अर गढ़वाळै जनानी नाटक का ये मुख्य अंग तैं



भली भाँति जाणदा छया।

जौन बाद्युं स्वांग देखी होल वू जाणदा छन कि कथगा इ दें अपण स्वांगू मा बाढी गौड़, त बादी रिक्, बाग दिखांदा छया (मनिखौं तैं कपड़ा पैरैक) त बाजिदा मनिख बण्यां जानवरू से अभिनय करांदा छ। मिन एक बाद्युं हास्यात्मक स्वांग देख छौ जखमा हंसी-हंसी मां इन दिखये ग्ये कि हौळ ब्युंत से लगाण चयांद ना कि बल्दू तैं चूटी-चाटिक हौळ लगाण चयांद। वु ठीक च बाद्युं स्वांग या जनान्युं कृत स्वांगू मा स्थान सत्यता या जात्रा की गतिशीलता नि होंदी छै पण चूँकि विषय सामयिक या जण्यां पछण्या होंद छ त स्थान विभिन्नता अर गति अन्तर तैं गौं का दर्शक अफि बींगि जांदा छ। दर्शक, विषय अर अभिनय असल मा स्वांगु एकी अंग होंदा छ।

सुकरात को २३०० साल पैली रचित पोयटिक्स मा समय एकता या स्थान एकता या भरत को नाट्य शास्त्र (१५०० बी.सी.) मा समय एकता, स्थान एकता या वर्ग एकता की जु शिक्षा च वा बाद्युं गढ़वाळै जनान्युं लोक नाटकू मा स्वतः मिल्दी छै। श्रुति व्यवस्था अर अनुभवुं से ही बादी या गढ़वाळै जनानी स्थान एकता, समय एकता या वर्ग एकता या वर्ग भिन्नता विषय मा सिद्धहस्त छयी। मिन बल्दौ स्वांग देखी छौ उखमा बादी की एक्टिंग से लगदो छौ कि हौळ लगांद दें पौड़ ए गे या कवी हौळ कै डालौं जलड़ पुटुक फंसी ग्ये। बातचीत अर ऐक्टिंग से समय, जगा अर जाति भेद दिखये जांद छौ।

करतबूं से भाव व्याख्या :- श्रुतिमूलक या पठनीय साहित्य मा मजा ल्हीण बान या त सुणण पोड़द या पढ़ण पोड़द इखमा मजा (आनंद) को स्रोत कवी कर्तब नि हौंदू। जन कि गितांग को गाण- गीत अर किताब को शब्द विन्यास महत्वपूर्ण होंद पण स्वांग मा एक्टरुं की एक्टिंग या करतब महत्वपूर्ण होंद। मुखाभिनय ही ना शारीरिक अभिनय बि स्वांगू मा महत्वपूर्ण होंद भरत का हिसाब से नाटक दृश्यकाव्य च याने कि स्वांग मा हरकतू से ही रससंपादन अर भावसंपादन ह्वे सकद अर गढ़वाळ का बादी या भरत की चेली जनानी स्वांगकार यी जाणदा छ।

मी तैं एक लोकनाटक याद आंद, जै स्वांग को विषय छौ सासू का भौं भौं नखर्याट, ये स्वांग की रचना हमारा गौं

की जनान्युं ही करी छै। इखमा इन दिखये ग्ये छौ कि जब ब्वारी मैत बटे ससुरास आंदी त सासू रूसर्या होउ त वा सास गणगणी आवाज मा बोल्दी छै ऐ गे तू अपण ब्वे बुबौं गौड्युं निफल्दी लगैक अर सासू मुख फेरी दींदी छै। त इन मा ब्वारी पैथर बटे इन सिवा लगांद छे कि सासू पैथरा तरफां धोति थोड़ा अळग चौड़ि जा (ज्यां से सासू तैं पता चल जाउ कि ब्वारी न सिवा लगाई) अर सासू तणेक फुण्ड सरकी जांदी छै।

अर ये ही स्वांग मा जब सासू ब्वारी मा सैरी (मित्रता या प्यार) होवु अर तब ब्वारी पैली सासू का खुट मा हाथ ६ रदी छै, फिर घुंड तैं छुंदी छै अर पैथर अपण हत्थ मुंड मा ल्हिजैक सिवा लगांदी छै त सासू ब्वारिक भुक्की (होंठ, नाक अर कपाळ) पींदी छै फिर बोल्दी छै। सदा स्वांगबंती रै, नौ नौ नौन्याळुं ब्वे बणि। गीतू बगत पर यो जरोरी नि होंद कि जूनी उज्यळ से ही या लालटेन को उज्यळ कामगार उज्यळ होवु त गौं की जनानी मुखाभिनय से जादा शारीरिक अभिनय भौं भौं बिम्बू की सहायता से स्वांग करदा छ। दृश्य काव्यावली की सल्लि छयी मेरी गौं की वु जनानी जु गीतू बगत पर स्वांग भरदा छ (अब मिन सूप स्वांग नि होंदा अब टी. वी. फिलम चलदन- ए बगत पर)।

गढ़वाळी स्वांगू मा पलौट :- नाटकू मा कथा अर प्लौट की बड़ी महत्ता होंद। पलौट मा घटना घटित होंद, घटनौं मा रससंपादन होंद, हरेक घटना कु संबंध अगवाड़ी-पिछवाड़ी सब्बि घटनौं से होण जरोरी च। यू संबंध जु स्वांग की घटनौं तैं जुड़दो, यू संबंध स्वांगकार का वास्ता एक संवेदनशील छ। यु संबंध दर्शकु मा आकर्षण बि पैदा कौर सकद। स्वांग रचण याने आकर्षण की बुणावट करण। स्वांगौ कथाविन्यास की साम्यता म्वाळ से करे जै सक्यांद म्वाळौ दुंळ स्वांग की घटना छन त स्योळौ डुण्ड स्वांग की घटनौं तैं जुड़ण वळा संबंध छन।

मिन जखमोलौं गौं मित्रग्राम मल्ला मा बाद्युं एक स्वांग देखी छौ जै तैं मि नाम दीणु छौ। हम सबि त चोर छावां। ये स्वांग की कथा अर पलौट सरल च इखमा एक मुंडीत मा एकाक ड्यारम दुंळदार तामौ पैसौं माळा चोरी ह्वे जांद। एक नौ दस सालौ छ्वारा चोर कु पता लगाण चांदो अर इन मा वै तैं पता चल्द कि वेका मुंडीत मा सबि कै ना कै रूप मा चोर



छन इख तलक कि वेकी बैणि, ब्वे , बुबा अर दादा बि चोर छन। पलौट दिखण मा सरल च पण नाटकीकरण का हिसाब से कॉम्प्लेक्स पलौट चा। ये स्वांग मा बादी न गीत, जागर, बड़ा मांगण वळा गीत (प्रशंसात्मक) गप्पबाजी आदि विधाओं को सहारा ले छै। कठिनता मा काव्यात्मकता ल्हैये ग्ये छै। कदम-२ पर आश्चर्य (ज्यांकी आशा कतै नि छै अर वो ही ह्वे) दिखण से ये स्वांग मा आखिरै तलक आकर्षण छै। ये स्वांग मा नौनु कुछ नि करदू बस वु दिखद च अर बकै चरित्र चुरयीं चीजुं तैं लुकाणौ प्रयत्न करदन।

उन त जादातर बादी हास्यप्रधान स्वांग रचदा छया कारण इन स्वांगु की ही मांग रै होलि पण बादी ट्रेजिडी बि जाणदा छ। एक दैं मिन एक स्वांग देखि जखमा एक जनानी रतौंधी की रोग ह्वेगे, पैल पैल वा जनानी ये रोग तैं लुकाणि राई अर लोगुं समणि इन अभिनय करणी राई जनबुल्यां वा सौब दिखणी होवु (इख मा हास्य अर व्यंग्य उत्पति ह्वे) त जब हौर लोगुं तैं पता चलि त लोग वीं जनानी दगड़ मजाक करण बिसे गेन। जनकि वा जनानी कपिलु खाणि होवु अर हैकी जनानी कपिलौ कढ़ै जगा पींडौ कढ़ै धौरि द्यावों त रतौंधी वळी जनानी बरड़ाउ “हैं खीरा पत्ता कनै तिमलौ लाब ह्वेन”, हालांकि लोक हंसदा छ पण छै ट्रेजिडी अर तब आखिरै एक जनानी ज्वायीं रतौंधी वळी जनानी का दगड़ जादा ही मजाक करदी छै वीं तैं बि रतौंधी ह्वे ग्ये । ये लोक नाटक तैं मि ट्रेजिक प्ले बुलदु। पैला अंक मा जब या जनानी अपणो रोग लुकांदी त पधान तैं पधान का ही समणि व्यंग्यात्मक रूप मा गाळि दींदी, असल मा या रतौंधी वळी जनानी समजदी कि यू बैख वींको द्यूर चं, हास्य व्यंग्य अर त्रासदी को संगम छै यु लोकनाटक। अब त मि कथगा इ डायलौग अर घटना बिसरी ग्यों निथरयीं थीम पर एक भौत बढ़िया नाटक मंचित ह्वे सकद। बाद्युं काम पणा ठाकुरुं तैं आनंद दीणौं काम छै त शिक्षाप्रद विषयुं से जादा वु मनोरंजनात्मक स्वांग रचदा छया पण कुदरती तौर पर हरेक स्वांग मा सामाजिक शिक्षा ऐ जांदी छै।

मैं तैं एक पलौट याद आंद जखमा एक नौनु बी.ए. पास कौरिक गौं आंद त तैका ब्वाडा, बुबा, काका वेका ह्वाड़ा बणदन अर डायलौग छ पढयां-लिख्यां नौनु अब त अपण बुबौं तैं घ्वाड़ा ही समझदन।

एक बात मिन देखी कि गढ़वाळि लोक नाटकुं मा लम्बा डायलौग नि होंदा छ जनकि मैदानुं मा नौटकी का स्वांगु मा मिन देखी छै। बाद्युं स्वांग ह्वावन या जनान्युं रचित स्वांग डायलौग छवटा ही होंदा छ। मिन गढ़वाळी स्वांगु मा पलौट सरल ही देखिन।

गढ़वाळी लोक नाटकुं मा अंक विधान :- भारत कु नाट्यशास्त्र होवु या सुकरात को नाट्य शास्त्र होवु या आधुनिक नाट्यशास्त्र होवन सब्युं मा अंक विधान का बारा मा बतये ग्ये। भरत का नाट्य शास्त्र मा त सैकडौं श्लोक अंकविधान पर ही छन। चूंकि गढ़वाळी का नाटक स्टेजविहीन होंदा छ त मि बोलि सकुद कि गढ़वाळी लोकनाटक अंकहीन ही होंदा छ-जगा, समय, को जु भेद होंद छै वु लोक स्वतः ही समजी जांदा छ। अंक भेद से जगा अर समय भेदा नि होंद छै बल्कण मा लोगुं की स्वतः समझ से अंक भेद पैदा होंद छै । कुछ डायलौग, एक्टरुं का शारीरिक हावभाव, सांस लीणौ तरीका आदि से अंक भेद को काम कर्दा छ। कबि कबि अंक भेद तैं गढ़वाळी नाटकुं मा गैरजरोरी भि माने जांद छै। मि अंकभेदु तैं चलनशील अंक भेद नाम दीण चांदु। एक स्वांग की याद आंदी जै तैं मिन अपण गौं मा देखी छै। ये स्वांग तैं मि नाम दीण चांदो “तीनु कजे कखि जुगा नि राई” इखमा एक बैखा (प्राहु) तीन ब्यौ छ। बेखौ नाम छै दशरथ अर वेकी तीन कज्याण्युं नाम छया कौशिला, सुमितरा अर कैकयी। अर युं तिन्युं बीच मा दशरथ कन मार, लात, गाळी खांदो यो दिखये गे छै। इखमा अंक भेद बड़ा सरल तरां से ह्वे। एक अंक को मंचन चौक का छ्वाड़ पर, हैंको अंक दैं तरफ, तीसरो अंक चौक का हैंका छ्वाड़ पर अर चौथौ अंक पैल वक्ती जगा पर ह्वे। भरत को नाट्यशास्त्र तैं नये जामा दीण यांको बुल्दन। भरत को नाट्यशास्त्र सुविधे आसंपन नाटयकर्म्यु वास्ता रचित ह्वे छै पण गढ़वाळी लोक जन अर बादी निछौंदी छ त स्वांगुं अंक भेद मा बिगळी बिगळी कौळ अपणये गेन। अच्चकाल एम्योचर या प्रयोगिक नाटकुं मा या विधि अपणये जांद। छबीलदास हॉल दादर मुम्बई मा प्रयोगिक नाटकु मा जु अंक भेद होंद उनी तरां से हमारा लोकनाट्यकर्मी (बादी अर जनानी) अंक भेद करदा छ।

अंक भेद समजण मा दर्शक होशियार ही होंदा छ चूंकि दर्शक आनंद लालाक्षी छया त आलोचक या सरोता दृष्टि का



नि होण से अंक भेद मा यदि त्रुटि होंदी बि छै त वा त्रुटि क्षमीय छै। बाद्युं स्वांग मा अंक भेद पाये जांदो छौ पण जनान्युं रचित स्वांगू मा वैज्ञानिक अंक भेद ना का बरोबर छौ पण दर्शक जाणि जांदा छ कि नाटक (स्वांग) मा अंक भेद ऐ ग्ये। लोक जीवन की या ही त खूबी च जु संसाधनु हिसाब से कै बि चीजुं तै परखणे आंखि रखदना।

कबि कबि बादी सूत्रधारी रूप मा समय, जगा अर वर्ग की इत्तला दींदा छ अर अंक विधान का नियम पूरा करदा छ। जखम जन जरोरत, तै हिसाब से काम चल्दु छौ।

एक स्वांग की मै तै याद आंदी इखमा बादी विषय से संबंधित गीत लगैक अंक विधान की जरोरत पूरी करदा छ।

जख तलक जनान्युं रचित स्वांगुं सवाल च इखमा पता नी कनकैक यी जनानी कंटिनुअटि लांदा छ कि अंक भेद की उन जरोरत ही नि होंदी छै जन कि विद्वान बात करदना। शास्त्रीयता का हिसाब से अंकभेद नि होंद छौ पण दर्शक बि अंक भेद मा शामिल होंदा छ। जनकि स्वांगकार एक स्थिति से दुसरी स्थिति मा जावन त दर्शक (जनानी) बोलि द्यावन ले सि अब धार मा ऐ गेन या गदन या रूस्वड़ मा ऐ गेन दर्शक ही जगा, समौ अर वर्ग भेद की बात बतांदा छ अर लोकनाटकुं की या बि एक खाशियत च। असल मा जनानी वो ही नाटक खिलदा छ जु गौ वालुन अनुभव (दिख्युं) होवु या जु स्वांग कतगा ही साख्युं से चलणु होवु जनकि 'छमिया बुड्या' या 'तै बुड्या की लंबी दाड़ि, तै बुड्या जाणु ना" जन लोकगीत पर आधारित स्वांग, हम इन बि बोलि सकदवां कि दर्शक सूत्रधार का काम बि करदा छया अर अंकविधान मा शामिल होंदा छ।

जादातर स्वांग छूवट -२ होंदा छ त हम बोलि सकदवां कि एकांकी स्वांग होंदा छ अर जु लम्बा स्वांग होंदा छ उखमा अंकविधान मा स्वांगकार, दर्शक, दर्शकु की समज शामिल होंदी छै।

स्वांगकार कथा कखन लांदा छ :- मिन जै जमाना मा जनान्युं या बाद्युं स्वांग देखी छौ (१९६७से पैली) वे जमाना मा क्या बादी क्या जनानी जादातर अनपढ़ ही छया। कैन बि कालीदास, जयशंकर प्रसाद, मोहन राकेश या सेक्सपियर का नाटक नि बांची छ। अर यी लोक नाटक खिलदा छ अर नाटकू मा कथा बि होंदी छै। जादातर कथा या त साख्युं से चलण वळी

नाटिकाऊं (गीतेय) वळी होंदी छै या समाज से उठयीं घटनौं पर आधारित होंदा छ।

जनान्युं का स्वांग मा जादातर जनान्युं से संबंधित कथा होंदी छै। कबि कब्यार न्याड़ ध्वारौ लोगुं की मजाक करे जांदी छै, या कवी खास आदिमै या मनिख्याणीक मिमिक्री बि मिन देखिन, युंकी कथौं मा समाज ही होंद छौ कल्पनातीत कथौं की जगा नि छै।

ठीक च बादी अतिशयोक्तिपूर्ण हिसाब से नाटकू मा नाटकीयता ल्हांदा छ पण मूल कथा समाज से ही ल्हांदा छ। कल्पना सिर्फ नाटकीयता ल्हाणै वास्ता प्रयोग होंदी छै। विषय वस्तु गौं की होंदी छै अर कत्ति दें की दर्शक नाराज भि होंदु छौ कि बाद्युं न वेको ठट्टा लगै दे । रियलिज्म कथाओं मा साफ झळकदो छौ।

यो ठीक च कि बादी सामान्य कथाओं तै ही मंचित करदा छ पण युं कथाओं थै नाटकीयता दीणौ वास्ता असामान्य पलौट बणादा छ। जादातर बुडड़ी अपणी ब्यार्युं तै नौनु-नौन्याळ पाळण ै कौळ सिखांदन अर इख पर कवी नाटक खिले बि जावु त वु नाटक मजेदार नि ह्वे सकद। पण जब कवी रंडवा बुड्या यो ही शिक्षा अपणी ब्यार्युं तै दूयो त पलौट असामान्य ह्वे जांद। मिन एक बाद्युं-स्वांग देख छौ जखमा पात्र छया एक रंडवा बुड्या द्वी ब्यारी अर वु दुयुंका दुधी का बच्चा, जगा गौं से भैर एक इकुळ्या कूड़ अब यू बुड्या कै तरा से अपण ब्यार्युं तै कौळ सिखांद इख तलक कि माहवारी का वास्ता वु बुड्या मोटी लंगोट बणौकी ब्यार्युं तै दींदो। एक डायलॉग छौ।

बुड्या (ब्यारी तरफ पीठ कौरिक) ए ब्यारी पूसौ मैना च, नौनु तै ढकीक दूध पिलावो, दूधुं पर ठंड लगी जालो त नाती तै अखळ बि लगी सकदन सामान्यता तै असामान्यता को रंग दीण बाद्युं तै आंदो छौ। ये स्वांग मा डायलॉग समाज का ही छ पण बुडड़ी का जगा बुड्या से वी डायलॉग बुलये गेन त स्वांग मा स्वतः नाटकीयता ऐ ग्ये। ये ही स्वांग मा बुड्या एक ब्यारी तै हैंकी ब्यारी क तैल मालिश की सला दींदो ब्यारी तेल मालिश करद दें शरमाण नि चयांद चाहे कवी बि जगा (अंग) होवु इखमा 'जगा' बुल्द दें स्वांगकार (बादी) जोर से उच्चारण करदो अर ये ही उच्चारण से नाटक मा नाटकीयता



आइ छै। कथा तँ पलौटीकरण अर पलौटीकरण को नाटकीकरण मा बादी सिद्धहस्त छया।

कति पलौट इन होंदा छ जुकि भौत ही सामयिक होंदा छ या अङ्गै या गौं तक ही सीमित छया। हमर अङ्गै मा एक बौंडर्या ओड ब्वाडा छया त एक रात गौं की जनान्यून एक मुक स्वांग रच जै मा बौंडर्या ओड की नकल छै जनकि पाणि पीण, चर्णाभित्त पीण आदि आदि अर ये स्वांग कु मजा सिर्फ वी ले सकद छ जु बौंडर्या ओड तँ जाणदा छया वो ओड ब्वाडा पाणि बि बै हात्थन बर्तद छया अर खाणक बि बै हात्थन खांद छया।

सदाबहार पलौट असल मा गीत गद्य मिल्वाकी स्वांग होंद छ जन कि प्रेम कथा, बेटीक अषाढ या पूसौ मैना मैत नि आण, सोत्या कलह, अत्याचारी सास या ससुरा या क्वी बि नाटक दुखांत होवु या सुखांत यां पर कम ही जोर होंद छै। जख तलक दुखांत स्वांगुं सवाल च जादातर दुःख जनान्यून जोग आंदो छै।

लोकनाटकं मा चरित्र चित्रण :- चूकि जादातर नाटकं कथा, कथ्य, पलौट, समाज बटे उठये जादा छ त कै बि चरित्र का विकास मा देरी नि होंदी छै। मै इन लगद चरित्र विकास का मामला मा स्वांगकार अपण दर्शकूं की समज पर पूरा भर्वस करदा छया। या दर्शकूं तँ वो इ चरित्र दिखये जांदा रै होला जौ तँ दर्शक भली-भौति परिचित रौंदा छ।

चरित्र विकास या चरित्र चित्रण को सबसे बढ़िया तरीका छै विशेषण, अलंकार अर बिंबूं को प्रयोग। चरित्र कु कर्मू से जादा डायलौंगु से चरित्र चित्रण करे जांदो छै जनकि रेडिओ नाटकं मा या पद्धति अपणये जांद। चूकि मेकअप अर मंच को वातावरण ना को बराबर ही छै त डायलौंग ही चरित्र विकास या चरित्र चित्रण का काम करदा छ। कबि कबि त कलाकार ही अपण चरित्रो बखान करी दींदो छै निथर एक एक्टर हँका एक्टर को चरित्र तँ चरित्रित बि करी सकद छै।

चूकि लाउडनेश जादा होंदी छै त चरित्रूं तँ दर्शक जल्दि समज जांद छया।

जादातर स्वांगू मा चरित्र कथानक पर भारी पड़दा

छा (जु स्वांग मिन देखिन) जनकि छमिया बुड्या गीतेय अर गद्यात्मक नाटक च इखमा छमिया को क्रूर रूप ढग ढाळ कथा से जादा भाषित होंद द्याख मिन। ये एक सत्य घटना पर आधारित जनान्यून कृत स्वांग मा कथा से जादा एक चरित्र पर ध्यान दिए ग्ये छै। ये स्वांग मा एक जनानी एक गैर मर्द का दगड़ फंसी ग्ये अर बदनाम हवे ग्ये त कथा से जादा त वी जनानी तँ फांस खाण या हँको तिसरो मरद का दगड़ भाजि जाण चयांद पर ध्यान दिये गे छै यी जनानी का दगड़ संवाद बक्या (पुछेर) करदो। कुछ हद तलक संघर्ष संशय की स्थिति को चरित्र चित्रण मिन द्याख ये स्वांग मा।

वार्तालाप से भी चरित्र विकास करे जांद छै। जनकि गुस्सा मा या संत ह्वेकी ब्वारी सासु खुणि बुल्दी भैर वाळु खुणि त तुम सिरप्वळ जन चिपळ बणी जांदवा अर मै खुणि खदुळ कुता । वार्तालाप कु यु डायलौंग सासु क द्विचरित्र तँ चरित्रित करण मा सक्षम छै।

स्वांग मा अंतरव्यथा या अंतरकथा सुणण या सुणान से भी चरित्रो विकास करे जांद छै फिर चाल, ढाल, करतब, कबि कबि बोलि भेद (मतलब चरित्र कै अडगै कु छ), उठण, बैठण से भि कलाकार कु चरित्र दिखये जांद छै। जन कि मिन एक बाद्यून स्वांग मा बड़ि जातिक बामण अर छ्वटि जातिक बामण मा भेद द्याख कि बड़ो बामण हुक्का पींद पण छ्वटि जातिक बामण तँ चिलम दींदो, बड़ी जातिक बामणौ कपाळ पर तीन सफेद लकीर छै त छ्वटी जातिक बामण क कपाळ पर सिरफ लाल पिठै छै। ये इ स्वांग मा बड़ी जातिक बामण बार बार अपण जंद्यौ दिखांद। बाद्यून यो बामणु मा भेद दिख्यूं ही छै त बड़ी तरकीब से द्वी जाति भेद कु चरित्र चित्रण यी तरै से दिखये ग्ये।

तकरीबन सब्बि भाषाओं का व्यंग्यकारुन मुर्दा तँ सांक पर लिजांद दें क्या क्या कार्यकलाप होंदन यां पर ल्याख एक बादीक स्वांग मिन बचपन मा ही देख आली छै। ये स्वांग मा मुडैयुं ध्यान मुर्दा से जादा “गौड़ि-बखर्युं खरीद फरोक्त या कैकी जवान नौनीक ब्यौ कख होण चयांद” पर ही दिखये ग्ये छै। आठ या बारा मिनटौ स्वांग छै पण मै तँ अबि बि याद च। कथा कुछ नि छै बस कलाकार छर्वी लगाणा रैन।



चरित्रो स्वभाव हाव भाव (शारीरिक अभिनय) से :- बाद्युं या जनान्युं स्वांग मा चरित्रुं स्वभाव मुख से कम ही बतये जांद छै कारण द्वी इ लोकनाटकं मा प्रकाश व्यवस्था अपूर्ण ही होंदी छै त शारीरिक भाषा अर डायलॉग ही चरित्र को चरित्रिकरण मा कामयाबी का हथियार होंद छै। डायलॉग ही त गढ़वाली लोकनाटकं जान छै। लोकनाटक चाहे बादी खिल्दा छया या जनानी, द्वी जगा प्रकाश व्यवस्था की कमी छै त नाटकीयता लागौ बान डायलॉग अर डायलॉग डिलीवरी ही नाटक का केंद्र होंद छै। किरदार असल मा डायलॉग का किरदार छया। वातालाप या वार्तालाप शैली मा ही नाटक खिले जांद छै।

हालांकि डायलॉग ढांगू भाषा का हि होंद छै पण बादी कवि कवि क्षेत्रीय भिन्नता दिखाना बान वीं खास अडगै की भाषा तै भी इस्तेमाल करदा छया डायलॉगुं मा अतिनाटकीयता होण जरोरी छै कवी बात समजाण बिंगण होवु त डायलॉग लम्बा बि होंद छया निथर आम डायलॉग इन लगदा छै जन आम वार्तालाप होवु। चरित्रो अनुरूप ही डायलॉग होंद छै।

वार्तालाप मा कलाकारुं का डायलॉगुं मा अंतर दिख्यांद छै अर बादी जाणदा छै कि डायलॉग अंतर से नाटकीयता आंद, रियलिटी अर काल्पनिकता का पुट डायलॉगुं मा होंद छै डायलॉग अर वार्तालाप इन छया कि जादातर बाद्युं नाटकं तै लिखण कठिन ही चै। चूंकि यि नाटक अडगै पर जादा आधारित छया त यूं नाटकं तै लिखे बि जावु त समजाण कठिन ही ह्वे जांद।

गीत अर गद्यात्मक नाटक :- जनान्युं द्वारा गीतु बगत पर खिले जाण वळा स्वांग गीत अर गद्य का मिल्लाक होंद छै। बादी बि भौत सा नाटकं मा गीत गांदा छै।

नाटकं का प्रकार :- गढ़वाली लोकनाटकं का भेद हम कथगा ही तरां से कर सकदवां पण रस या विषय तै आधार बणैक ही नाटकं मा भेद करण ठीक रालो।

दुख दर्शादा नाटक :- जनान्युं द्वारा खिले जाण वळा स्वांग जादातर जनान्युं पर होण वळा अत्याचार दिख्यांद छया इखमा बि सासू का ब्वारी पर अत्याचार पर स्वांग जादा होंद छै।

जनान्युं पर समाज अर कौटम्बिक अत्याचार या अनाचार वळा विषय बि जनान्युं स्वांग मा होंद छै।

एक दै मैं तै याद च कुछ जनानी पंचैती चौक से दूर एक हौरू चौक मा 'सती' का स्वांग खिलणा छया अर उना बच्चौ तै आणौ मनाई छै। मिन लुक्कीक वु स्वांग द्याख जखमा सत्ती कन सत्ती होंद दिखये ग्ये छै। हमर गौं (ग्वील जसपुर ढांगुं) मा हमारी एक ददि सती ह्वे छै वे विषय पर ही यूं स्वांग छै। स्वांग का कवी दर्शक नि छया, सबि जनानी स्वांगकर्ता छया। जब सती सती होंद त सबि जनानी रूणा छया

बादी दुःखांत नाटक से दूर ही रौदा छया।

श्रृंगारिक लोक नाटक :- गीतेय लोकनाटकं मा श्रृंगारिक गीतुं भरमार होंदी छै। चूंकि म्यार विषय गद्यात्मक लोकनाटकं पर च त बि गीतेय लोकनाटकं पर नि लिखणु छै।

गढ़वाली नाटकं मा श्रृंगारिक शब्द जादातर विशेषण होंद छै, बादी कवि कवि बिचकीं छुर्वी पर बि चली जांदा छया एक स्वांग देखी छै जै तै मि नाम दीणु छै "बिचक्युं", उखमा एक डायलॉग च अर बादी एक बुड्या खुणी बुल्लु क्या गलादार काका! पैल तू कलोड्युं गलादार छै अब नौन्युं गलादार.....बिगरैली, बांद, गल्वड़, चाल जन शब्द से ही श्रृंगारिता प्रदर्शित होंदी छै।

वीभत्स या घीण पैदा करण वला नाटक :- अब गढ़वाली लो. कनाटकं संग्रह करण कठिन च किलै कि म्यार हिसाब से अब बादी बि नि रै गेन अर ठाकुर बि नि रै गेन जु ये साहित्य मा रूचि ल्यावन खैर हाँ त बाद्युं नाटकं मा घीण बि होंदी छै, अर बादी कोशिश कर्दा छया कि घीण से घीण कम हास्य रस मा दर्शक लहये जावन घीण अर हंसदारी को मिल्लाक बड़ा मजा अर सरलता से होंदे छै, जरा द्योखो-

(अ) एक मरद (झाड़ा बैट्युं) हमार मैं लगणू अब मेरी तागत खतम ह्वे ग्ये।

(ब) हँको मरद (वू बि झाड़ा बैट्युं छ) कनो क्या ह्वे?

(अ) भई पैलो मि बळिंड जन झाड़ा करदो छै



(ब) अर अब?

(अ) अब त झाड़ा चिमनी जन होंद।

(ब) मेरी बि दशा खराब चलणी च, पैल लिंडरी आंदी छै अब बकरोळ हगणू छौं।

बांचण-पढ़ण मा घीण लगली पण जब बाद्यूं न स्वांग करी छौ त दर्शक हंसदा ही रै गैन।

घीण मा घीण ही होंदी छै। मै तैं याद नि आंद कि मिन कै लोक नाटक मा मार काट या खून खराबा का प्रतीक देखी होलु, खून खराबा का वीभत्सपूर्ण रस की शायद दर्शकूं तैं जरोरत ही नि रै होलि।

लोकनाटकूं मा हास्य रस- बाद्यूं नाटकूं मा जादातर हास्य रस की ही भरमार होंदी छै। बकै रस त श्रमिक काम मा गौं वळूं तैं मिल्दा ही छ त शायद यो ही कारण राइ कि बाद्यूं नाटकूं मा हास्य रस जादा ही मिल्दो छौ।

हास्य रस गल्ती से, हावभाव, स्थितियूं मा अनगढ़पन, चरित्र विन्यासूं से या अन्य तरां से पैदा करे जांदो छौ, एक उदाहरण सटीक रालु:-

स्थान (अयेड़ी खिलण वळा एक मृग पकड़णै कोशिश) एक शिकारी (भौत जोर की आवाज मा) ये क्वी बि शिकर्या घ्याळ नि कौरिन। भारे घ्याळ नि कौरिन ।

दगड़या शिकारी (हौर बि जोर से) हां हां हमन बींगि याल। घ्याळ नि करण घ्याळ नि करण

(इथगा मा मृग भाजि जांदो)

स्वांगू मा गुस्सा-रोष :- जनान्यूं या बाद्यूं नाटकूं मा गुस्सा या रोष बि होंद छौ। डायलोगूं का अलावा हाव भाव मुंड झमडाण लत्याण, मुष्क्याण, दांत किटण जन शारीरिक अभिनय से गुस्सा रोष रस पैदा करये जांद छौ।

वीरता: संपूर्ण वीर रस से भरपूर नाटक मिन त नि द्याख पण बीच बीच म वीरतापूर्ण क्रियाकलाप मिन बाद्यूं

नाटकूं मा अवश्य द्याख।

भय, डौर-भौ :- जनान्यूं नाटकूं मा यू जादा ही होंद छौ, सासू डौर, बागौ डौर आदि सामान्य डौराण्या दृश्य होंदा छ। बीच बीच मा झस्काण जन क्रियाकलाप बि सामान्य छ।

भूत पिचाश भगौणौ दृश्य मा बि भय अर परलौकिक रस की उत्पति होंदी छै।

वात्सल्य रस :- जनान्यूं स्वांगू मा दूधि पिलाण या ब्वे कु पचास सालौ नैनु तैं चमताळ से अड़ाण वळा दृश्य मिन देखिन। ब्वे कु अपण नौना कु सीप फुजण वळा दृश्य भि म्यार जनान्यूं स्वांग मा दिख्यां छन।

सिखाण वळा नाटक अर समस्या मूलक स्वांग :- निखालिस सीख दीण वळा स्वांग त नि देखिन पण बीच बीच मा भौत सा सीख दीण वळा स्वांग होंदा छ। उन यूं स्वांगू का उद्देश्य समस्या मूलक ही हूंदो छयो।

स्वांगू मा सूत्रधार :- बाद्यूं नाटकूं मा सूत्रधारी कला छै पण जनान्यूं नाटकूं मा सूत्रधारूं जरोरत नी होंदी छै किलैकि यि नाटक ट्रेडिशनल नाटक होंदा छ अर नाटक दिखण से पैली सब्यूं तैं पता होंद छौ कि विषय क्या च ।

मंच व्यवस्था :- गढ़वाळी लोक नाटकूं मा मंच व्यवस्था की क्वी खास शैली नि होंदी छै। जनता का बीच खाली जगा ही मंच होंद छौ। समय, स्थान अर वर्ग की सूचना सूत्रधार ही दींदो छौ।


मेकअप :- मेकअप उन आज को हिसाब से नी होंद छौ पण कलाकारूं को पहनावा मा कखि ना कखि ध्यान अवश्य दिये जांदो छौ।

छमिया कपड़ौ से मेकअप आदि होंद छौ जनकि छमिया बुड्यौ गौळगांड झुल्ला की दिण्डी से बणदी छै। या छमिया का सींग का वास्ता कठग प्रयोग मा आंदा छया।


कलाकारूं ट्रेनिंग :- जख जलक बाद्यूं सवाल च बादी -बादण या वूका परिवार वळा ट्रेड ही होदा छ गौं मा जरोरत का हिसाब



दीवाली की शुभकामनौ
दगड़



कौठारी सैनेट्री वर्क्स




लाडपुर, रायपुर रोड़, देहरादून

ईगास - बग्वाळ की शुभकामनाओं का दगड़

पंचवार स्वीट्स ऑफ

लाडपुर, रायपुर रोड़, देहरादून



-बरात, पार्टी मा कैटरिंग का खास व्यवस्था



ग्लोबलाइजेशन का दौर मा आंचलिकता

आशीष सुन्दरियाल

ग्लोबलाइजेशन का युग मा जब कि हरेक आदिम केबल अर इन्टरनेट जना संचार माध्यमों से सीधा सम्पूर्ण विश्व का सम्पर्क मा छ इन मा आंचलिकता अर आंचलिक भाषा साहित्य का समणि अपना अस्तित्व तैं बचाणै भौत बड़ि चुनौती खड़ि छ।

भले व्यवसायिकता अर बाजारवाद का दौर मा ग्लोबलाइजेशन से आंचलिकता भारी प्रभावित होणी छ पर ग्लोबलाइजेशन बनाम आंचलिकता की बात भि ठिक नी छ। हाँ ! इतना जरूर छ कि आंचलिक भाषा, साहित्य, समाज अर संस्कृति तैं मजबूत बणाणा वास्ता हमतैं कुछ खास जतन अवश्य कर्ण प्वाड़ला।

इन बात नी छ कि संचार क्रान्ति से आंचलिक भाषा-साहित्य अर समाज तैं नुकसान हि उठाण प्वाड़णू हो, यांको एक सकारात्मक पहलू यो भि छ कि अगर सोचि समझि कै काम करे जावा त हमरो एक छवटो सि प्रयास भि हमारी आंचलिक विशिष्टता तैं विश्व पटल पर पहचाण दिलै सकद। हम भि यूं संचार माध्यमों को प्रयोग अपना भाषा-साहित्य अर संस्कृति का प्रचार-प्रसार का वास्ता करि सकदां अर सिरप अपना समाज मा हि ना बल्कि हौरि लोगुं का बीच भि अपना भाषा-साहित्य तैं लोकप्रिय बणै सकदां। हाँ ! यांका वास्ता यो जरूरी छ कि हमारा साहित्य की विषयवस्तु सार्वभौमिक अर सृजनशीलता को स्तर उच्चकोटि को हो ताकि विश्व स्तर पर यांकी कद्र हो।

जख तक गढ़वाळि भाषा- साहित्य, समाज अर संस्कृति को सवाल छ त आज हम विकास का सबसे

अहम दौर से गुजरणा छाँ, राज्य बणणा बाद लोगुं मा कुछ उत्साह त दिखे छ पर क्वी ठोस काम अबि तक नि ह्वे, नेम अर फेम का गेम मा सब्बि उलझि कै रै गिन।

आज भाषा-साहित्य समाज अर संस्कृति का सम्बर्द्धन अर संरक्षण का वास्ता सबसे जरूरी छ नई छ्वाळी को अपना भाषा अर अपना साहित्य का प्रति रुझान-यांका वास्ता जरूरत सिरप इतना छ कि अपना भाषा साहित्य अर समाज की वो तस्वीर नै छ्वाळी का

समणि प्रस्तुत हो कि वू तैं भि लगे कि हाँ यामा कुछ खास बात छ अर वूमा भि अपना भाषा -साहित्य समाज अर संस्कृति का वास्ता कुछ कर्ने इच्छा जागृत हो अर वो अपना पौराणिक परम्पराओं अर गौरवशाली अतीत से जुड़िक अपना समाज का वास्ता स्वा. भिमान का साथ काम करीन्।

पर हमरा यख त सब कुछ उल्टु हूणो छ पैली त साहित्य संस्कृति का संरक्षण अर सम्बर्द्धन का वास्ता क्वी

ठोस काम नि हूणो छ अर दुसरो जो कुछ लोग संस्कृति का नाम पर ध्याळू मचाणा छन वो सिरप निम्न स्तर का गीत/रचना ज्वान पीढ़ी का समणि पेश करी कै संस्कृति का जलड़ा घाम लगाणौ काम कर्ना छन यूं लोगुं मा जादातर वो छन जो पहाड़ की परम्परा, रीत-रिवाज, तीज, त्यौहार आदि का बारम न त अंक्वे कै जणदा अर न अंक्वे कै जणण चांदा।

आज जब व्यवसायिकता अर बाजारवाद समाज



गढ़वाळि भाषा का विकास मा अवरोध

दर्शन सिंह रावत

उत्तराखण्ड राज्य का अर्न्तगत गढ़वाल कमिश्नरी जो कि ३० हजार वर्ग किमी. मा फैली छ का ३८ लाख लोगों की पहचान गढ़वाळि भाषा का विकास का बाटा मा कुछ स्वार्थी लोग सदनि उपुरचिण्डा खडा कर्ना रैन। गढ़वाल का पंवार राजवंश की राजभाषा गढ़वाळि मा द्यबतौ का जागर, आवाहन, स्तुति, माँगल अर तन्त्र-मन्त्र आदि याद करैणा रैन। गढ़वाळि मा सन् १७५० बटे लिखित मा पत्र, साहित्य, शिलालेख, दानपत्र लिखैण ॥ रैन। या भाषा न्याय, प्रशासन अर शिक्षा को माध्यम रै।


जार्ज अब्राहम गियर्सन का लिंग्विस्टिक सर्वे ऑफ इण्डिया १८६४-१९२६ मा गढ़वाळि को तुलनात्मक अध्ययन कैरिक भाषा का तौर पर इस्तमाल हूणो बतए गे छयो। गढ़वाळि मा भाषा का विकास मा सबसे बडू झटगा गोरखाली से ह्वे वे बगत हमारो भौत सि साहित्य जलै दियेगे नष्ट कैर दियेगे, गोरखा शासन से मुक्ति का बदल अद्दा गढ़वाल अंग्रेजों तै दे दियेगे,

गढ़वाल का राजा मा जो क्षेत्र छै वो अविकसित छयो, पिछड़ो छै इलै गढ़वाळि भाषा को जो रिवाज हूणो छै वैते झटगा लागि, राज्य का पास साधनों की कमी हूण से साहित्य प्रकाशन मा बाधा ए, ब्रिटिश गढ़वाल मा हिन्दी अर अंग्रेजी माध्यम से शासन हूण लागि, साहित्य पर वाँको असर हूण हि छयो। लोगों मा भाषा का प्रति पैलि जन प्रेम नि रै। गढ़वाळि साहित्य को विकास भि रूक गे।

संयुक्त राष्ट्र संघ की संस्था यनेस्को न् विश्व की भाषाओं तै खतरा मा बताण वला एटलस का दुसरा संस्करण तै जारी करि छै। यूनेस्को न विशेषज्ञों का हवाला से बतै कि पूरा विश्व मा ब्वले जाण वळि छ: हजार भाषाओं मा बटि करीब अद्दा खतरा मा छन पिछली तीन शताब्दियों मा भाषाएं तेजी से खत्म या गायब ह्वीं। कै समुदाय की भाषा तब खतरा मा हूंद जब

कम से कम तीस प्रतिशत बच्चा वीं तै सिखदा नि छन। क्वी भाषा किलै अपनी पच्छ्याण हरचांद येको खुलासा कैरि एटलस ब्वलद कि इन तब हूंद जब वा कै आर्थिक रूप से मजबूत संस्कृति का सम्पर्क मा आंद। यी गढ़वाळि भाषा दगड़ ह्वे।

गढ़वाल मा जनसंख्या बढण से खेती से गुजरो हूणो कठिन ह्वेगे, लोग मैदानों की तरफ पलायन कन बैठगिन, रोजी-रोटी खुणे हिन्दी सीख, ब्रेड-मक्खन खाणा खुणे अंग्रेजी जनी कठिन भाषा सीख दे पर बच्चों तै गढ़वाळि नि सिखै पर



जब वो लोग पंजाब, गुजरात, महाराष्ट्र गैनि बच्चों तै बड़ि खुशी से पंजाबी, गुजराती, मराठी सिखांदी पर अपनी भाषा सीखण कठिन लगद। लोग अपनी धर्ति, भाषा संस्कृति में कटेण लगीं, गौं जाणौं भूलगेनि। गढ़वाळि भाषा अर संस्कृति तै लोग गर्व से नि अपणौदा, यांका वास्ता वूका मन मा कखि न कखि हीन ग्रन्थि विद्यमान छ। इलै हि गढ़वाळि भाषा साहित्य को विकास नि ह्वे साको अर ये नागरिक अपनी संस्कृति तै भुलदा जाणा छन।

आजादी का बाद शिक्षा को प्रचार-प्रसार हूण लगे, शिक्षा को माध्यम मातृभाषा की जगा हिन्दी हूण से लोग गढ़वाल मा रैकि भि उप्रि सि ह्वेगिन मैदान की तरफ जाण चाणा छन उच्चवर्ग मा जाणा कि लालसा मा अपनी भाषा तै छ्वडणा छन लोगों मा साहित्य संस्कृति अर भाषा का प्रति निरन्तर उदासीनता बढदा जाणी च,

अपनी भाषा सीधा दिल पर असर करद याँ तै ब्वलण मा शर्म या हीन भावना का जगा गर्व हूण पर ही भाषा का विकास का दगड़ै दगड़ समाज को विकास हूंद समृद्धि आंद लोग मिलदा जुलदा छन अपना सुख-दुःख बतां दिन। उत्तराखण्ड राज्य आन्दोलन का दौरान गढ़वाली भाषाविद् गढ़वाली साहित्यकार,



विचारक जो कि अलग-अलग विचार धारों मा बट्यां छया एक ह्वेगिन वून जनता तैं चितै नेतृत्व प्रदान करि अर आन्दोलनों मा भाग लहे अर इन कैरिक राज्य बणण पर वो स्वचण बैठिगिन कि अब त हमारि भाषा राजभाषा बणली, गढ़वाळि भाषा साहित्य अकादमी को गठन होलो सरकार पाण्डुलिपियों का प्रकाशन मा मद्द कारली शिक्षा को माध्यम मातृभाषा होलो परन्तु या बात वूं लोगो का स्वारथ का खिलाफ छ जो फूट डालो और राज करो की नीति अपनौणा रैंद छ,

वून नयी चाल चलि अर साहित्यकार भी वूका बखाण मा एकि बिना पूरी जानकारी का ब्वन लगीन कि उत्तराखण्डी भाषा बणै जा। पैली जो छ वीं तैं समालण बजाय वै भाषा का विकास की बात करणो कै भि आदिम तै भाषा विहीन कैरि देणों, वे ही तराँ छ कि एक मनखि तै कै खाली टापू मा अकेला छोड़ि देणो वे तैं वेका इतिहास से अलग कैरि देणो संस्कृति विहीन कैरि देणों भि एक सामाजिक अपराध छ वै तैं वेका गौरव से अलग कैरि देणो वैते पखों बिना पंछी जन बणाणौ छ भाषा से व्यक्ति की पच्छ्याण हूंद, भाषा वेका विकास की सीढ़ी हूंद वेकी सांस्कृतिक परम्परा तै अगनै लिहजांद,

गढ़वाळि अर कुमाऊँनी भाषा विकसित छन अर राज्य की द्वी राजभाषा ह्वे सकदन जनकि कनाड़ा स्विटजरलैन्ड मा छन। उत्तर प्रदेश मा द्वी राजभाषा छन त उत्तराखण्ड मा किलै नि ह्वे सकदी,

गढ़वाळि व कुमाऊँनी भाषा विकसित छन यूंको शब्दकोष छ व्याकरण छ लिपि छ, साहित्य को इतिहास छ इलै यूंको विकास करे जावा सरकार यामा मद्द कार याँकी बेवसाइट बणये जैं , टेलिविजन चैनल शुरू करे जावा।

भाषा को निर्माण त समाज अपणी जरूरत खुणे करद अर येका बणण मा ४५०-५०० साल लग सकदन। भाषा जो विद्यमान छ वा तै किलै भुलाण चाणा छन लोगों तैं क्या ५०० साल भाषा का बिना रखण चाणा छन वूं तैं अपच्छ्याण वळि अजाण भीड़ को हिस्सा किलै बणाणा छन। जो छैं छ वे तैं किलै खौण चाणा छन।

भाषा अस्मिता की पच्छ्याण छ, संस्कृति की संवाहक छ ये से ही समाज को विकास हूंद हम किलै समाज को विकास रोकण चाणा अकबर न भि दीन ए इलाही धर्म चलाणै छौ वेका म्वरदै खतम ह्वेगे यूरोप मा ऐसपटेनटी भाषा बणैकि पुरण पी भाषाओं तैं खतम कनै छौ पर लोग अपणी फ्रेंच, जर्मन, इटिलियन भाषा रखण चाणा छन,

उत्तराखण्डी भाषा न त छ अर न छै, वेका नाम पर विकसित गढ़वाली की बलि क्यो दीण चाणा छन। गढ़वाली भाषा का विकास का वास्ता जागरूक नागरिक, साहित्यकार, पत्रकार जुड़ना छन जै से कतनै लोगों तैं खतरा महसूस हूणो छ गढ़वाली त संविधान की आठवीं सूची मा दर्ज ह्वेकि राजभाषा बणकि राली येका बाटा मा उपुरचिण्डा लगैकि येको
vvv

दीपावली की भुभकामनाओं का

दगड़

विक्रि डेरी

लाडपुर, रायपुर रोड़, देहरादून उत्तराखण्ड



आर्केस्ट्रा का घपरोल मा गोल, नौवती ढोल का बोल

सुलोचना परमार उत्तराखण्डी

जै समाज की अपणी सभ्यता अर संस्कृति नि होंदी बाद मा वे समाजो क्वी नौं ल्हिदरु नि रौंदू ईं बात तैं सब्बी जणदन संसार मा कै भी समाजै आपणी पछ्यांग तभी ह्वे सकदी जब वे कि अपणी संस्कृति हो, अपणी बोली भाषा हो अपणा तीज त्यौहार होन तथा अपणा जीवन जीण कू एक ढंग हो, यू हमारु सौभाग्य च कि हिमालय कू उत्तराखण्ड क्षेत्र भौत पुराणा समय से सांस्कृतिक रुप मा बेहद समृद्धशाली रै, शुद्ध भारतीय संस्कृति की झलक यखि मिलिदि, यख का त्यौहार, विश्वास, लोकमान्यता, लोकनृत्य, लोकगीत, वीरगाथा, वैदिक संस्कृति से मेल खान्दन,

जनी जनी हमारा समाजौ कू विकास ह्वे इंसानन अपणा मनोभावों तैं, हाव भावों तैं नाच गाणा अर संगीत का द्वारा लोगों तक पहुँचाई। सामाजिक व सांस्कृतिक विकास का दगड़ा दगड़ी जन संचार माध्यमों कू भी विकास ह्वे वास्तव मा गीत संगीत अर नाच मनख्युं कि कुंगली भावनाओं से उपज्यां विचार छन। गीत, संगीत अर नाच उत्तराखण्ड मां यू तीनों विधाओं कू महत्व कुछ ज्यादा ही ह्वेगे किलै कि आजकल इलैक्ट्रोनिक कू महत्व अर मीडिया की बाढ सी ऐगे ज्यां मा नीति रीति तैं अर सांस्कृतिक मूल्यों तैं खदरा मा धारी तैं विदेशी संस्कृति सस्तू मना। रंजन, विदेशी मानसिकता पर बण्या कार्यक्रम अर विदेशी संस्कृति की लत उत्तराखण्डी समाज मा बढणी छन ज्यां से सांस्कृतिक परिवेश तैं जिंदा रखणा वास्ता हमतैं अपणा गीत संगीत तैं जिन्दा रखी तैं जन माध्यमू का रूप मा प्रचारित व प्रसारित करण होलो तभी हम भैरे संस्कृति कू सामाजिक हस्तक्षेप कम कर सकदां।

वास्तव मा गीत संगीत अर नृत्य पैली बटि ही मानवीय संवेदनाओं तैं छूण मा महसूस करण मा प्रभावकारी साबित ह्वेन

लोकगीत मनखी जात कि कुंगली भावनाओं तैं समणी ल्हौप तैं एक माध्यम च दुःख अर सुख द्वी अवस्थाओं मा मनखी अपणी संस्कृति व परिवेश का आधार पर वे तैं सुर अर ताल दें दू, तभी त सुख मा गै कि तैं खुशी अर दुःख मा गैकी तैं अपणी खैरि बिपदा भूल जांदू, इनी भावों का क्षण ही मनखी की ओठणी मा गीतों कु स्वर गुंजोदन त गीत का बोल तौ ही ओठण्युं से निकलदन,



लोकगीत मानव जीवन की जिकुड़ी की घडकन छन, यू तैं सूणी तैं व गै शान्ति मिल्दी, तभी त पहाडों डाँडयूं मां सीढी नुमा पुंगडयूं मा हौळ लगोदरु किसान भी गीतों तैं गैकी मस्त होयूं रौंदू कै जमनों मा रोपण पी लगौंदी दा क्या ढोल दमौं बजदा छा, गीत लगौण मा कामौं कू पता ही नि चलदू छौ, गोरु बखरा चरौंदी दा डाँडयूं मा ग्वेर छोरा जब बाँसुरी की धुन छेड़दनि व गीत लगौण त डाँडी काँठी भी अपणी आवाज तौं दगड़ी मिलौदन वास्तव मा ई लोकगीत हमारा समाज की वूँकी खुशी अर गम,

चेतना ऊर्जा की वाहक छन तभी त सुबेर बटि श्याम तक घास कटदरी तौं गीतों का ही सहारा डाँडी काँठयों दगड़ी बच्याण पी रौंदिन जरा सोचा गाड़ी चलौंदरु डरैबर भैजी ऋषिकेश व कोटद्वार का स्टेशन बटि गाडी का पहियों तैं गीतों का सहारा तौं अंधेरा पहाडों अर अंधा मोडों तैं अंधेरी रात्युं मा पार करदन, दरअसल मा ई लोकगीतों मा मानव जीवन की उल्लास की उमंग की करुणा की व वूँका समस्त दुःखों की सुखों की आत्मसात करण की अद्भुत क्षमता च।

आज पर्वतीय संस्कृति का संरक्षण व संवर्द्धन का लगातार



प्रयास होना छन, जैमा पौड़ी, नैनीताल, मसूरी, देहरादून शहरों मा शरदोत्सव, ग्रीष्मोत्सव का आयोजन तथा श्रीनगर, देहरादून, अगस्त्यमुनी, गौचर मा सांस्कृतिक मैलों का आयोजन होणा छन वास्तव मा अपणी लोक परम्परा की समृद्धि करण का वास्ता पहाड़ वासियों कू सही वक्त पर सही कदम होयूँ चैंदू ढोल दमों जु उत्तराखण्ड की संस्कृति की पछ्याण च अब वे तैं लोग भूल जाणा छन, शादी, ब्याह, मुण्डन, जनेऊ संस्कार यामा ढोल, दमोकी उपस्थिति शुभ मनैदी छै पर अब त पाश्चात्य संस्कृति कू इन्नु प्रभाव पड़णू च कि ई अपणी संस्कृति की आत्मीयता व पवित्रता तैं भी लोग भूल जाणा छन ज्यांकी वजह से दूर डाँडी काँटी का गौं मा भी अब ढोल दमों रणसिंगा अर सब्बी गाजा बाजों की जगा आर्केस्ट्रा की उल जलूल संस्कृति को बदरंग प्रभाव पड़णू च आज ब्यो-बरत्युं मा धुयेला (दीपोपासना) ताल अर इन्नी कई ताल सुणणू तैं कन्डूइ तरस गिनी,

आज आर्केस्ट्रा ढोल से मंगलस्नान, गायदान धूलिअर्ग अर वेदी (विवाह मण्डप) म बजायी जाण वाली विशेष धुन छीन यालीन अब जु गौं मा दूर दूर बिखरंया मकान छन तख रौण वाला बुढ़या मनख्यों तैं त पतै नि चलदो कि कबरी बरात आई अर कबरि गै। कि आर्केस्ट्रा मा पैटवा बाजा नि लगदो, मंगल स्नान गायदान, कू भी पता नि चलदो किलै कि ढोल की विशेष वरन धुन अब सुणाई नि देंदीन, अर श्रंगार अर शान्ति की प्रतीक नौ निधि ८ सिद्धि १४ भुवन ६ पत्तन अर २२ पड़ताल वाली अभिव्यक्ति संगीत युक्त नौबती ढोल से नि सुणाई दें दीन,

आज रहमानी ताल (विशेष अभियान) भी नि बजदू जु निःसन्देह हमारी सु संस्कारित अर सुव्यवस्थित संगीत संस्कृति पर हमला च नाच याने लोकनृत्य मानवीय संवेगों की एक सहज अभिव्यक्ति च, उत्तराखण्ड हिमालय मा गीत संगीत अर नृत्य का कार्यक्रम साथ-साथ चलदन थड्या, चौफला, झुमैलो, नाग सिद्धवा, ग्वरील, नरसिंह तथा पांडवों का लोकनृत्य ई देवभूमि मा विशेष लोक प्रिय छन लेकिन भागदौड़ की जिन्दगी अर केविल संस्कृति का प्रचलन से लोगों मा व्यक्ति वादी दृष्टिकोण पनपुणू च जैसे समाज मा आज टी.वी. का प्रचलन से लोग पिक्चर, सीरियल देखण मा इथगा व्यस्त रौंदा कि पंचैती चौक

मा झुमैलो अब नी लगदो हो जौनपुर (टिहरी गढ़वाल) अर जौनसार यां कू अपवाद च उत्तराखण्ड से भैर बसण याने पलायन करण वला लोगों की प्रवृत्ति समझा या मानसिकता अपणी भाषा संवर्द्धन व गाड़ियों मा बाजारु मा, दुकानु मा, मेलों मा, कौथीग मा अफू तैं श्रेष्ठ दर्शोण का वास्ता कुछ लोग भूलकरि भी अपणी मातृभाषा नी बोल्दा, पाश्चात्य संस्कृति कू संक्रमण अब गौं मा भी ह्वे गै, अर नई पीढी त अपणी भाषा से दिन पर दिन विमुख होन्दी जाणी च।

संस्कृति कू एक महत्वपूर्ण आयाम च वखा का लोगों की वेशभूषा अर पैनावा (पहनावा) ई दृष्टि से भी उत्तराखण्ड की संस्कृति समृद्धशाली रै, उल्लेखनीय च कि पर्यावरण व जलवायु की दशाओं पर भावर से उच्चहिमालय तक कई प्रकार का वस्त्र लोग प्रयोग मा लहैदन परन्तु अब फैशन की बयार मा कुछ त बिल्कुल लोग अपणी वेशभूषा पहननू भूल गिन जन त्युंखा, चदरी, कामल, पाखला, लवा, ऊनी टोपी, जुराब, त्रगड़ी (करधानी) कभी-कभी दूर दराज का क्षेत्रों मा यदा कदा देखणू मिल जान्दन ई मोरा लोगू तैं पर्वतीय परिवेश मा सुन्दर अनुकूलन करण मा सक्षम छ जब कि आज परिवर्तन की लहर मा लोग कोट पैट जींस पुलोवर कार्डिगन पहनना छन, जवाहर कट अर खादी कू प्रचलन भी उथगा नि दिखेंदो जथगा पैली छौ,

उत्तराखण्ड की संस्कृति कू एक अनर्थ यू भी च कि यखा पर्व त्यौहार अपणी चमक खोणा छन लोग अपणा मैलों कौथिगों तैं याद करदन पर वे मा भाग लहेण से बचदा छन, होली, बग्वाल, दशहरा, पांडवनृत्य, रामलीला, नौरत्ता आदि मा लोग सिर्फ औपचारिकता निभौणा छन, जख थौडी भौत परम्परा जीवित भी छन जन बागेश्वर कू उत्तरायणी मेला, उत्तरकाशी कू माघमेला श्रीनगर कू बैकुण्ठ चतुदर्शी मेला, बसन्तोत्सव त तैमा भी कब विघ्न पड़ जौ क्वी नी जणदों, ज्यां से दिल खोली लोग शामिल नि ह्वे सकदा, ई परिवर्तन की आँधी मा मंत्रअर आयुर्वेद अप्रसांगिक ह्वे गिन अर ज्यां से तुरन्त फायदा हो इन उपाय लोग करणा छन, नवान्त की पूजा परम्परा वृक्ष पूजा, जलाभिषेक आदि धीरे-२ छुटणा छन जीवनोपयोगी सांस्कृतिक रूप से प्राणवान और आर्थिकी का स्रोत कुटीर उद्योग समाप्त होन्दे जाणा छन ज्यां से बेरोजगारों की भीड़ बढणी च वूंकू

व्यवलागार पलायन बढणू च,

अब आवश्यकता महसूस होणी च या इन्नु समझा कि



सुबेर जब सूरज कांट्यों का पोर झिमलाट कैदु, भात गुट्यार मा छानी भितर बाध्यां गोरु-बछरा खुलि हवा मा औण तैं अडाट मचै देंदा छया। वूका गळा बंधी घंडुळि-खांकर वूका मनै बात ग्वस्यो तैं बतैं जांद छया। अर यन माहौल मा एक हेंकि रंगत ज्व मैं तैं अजाण लगदि छै वा हमरा गौं का खोळा-खोळौं बटि “अला चलणु छ स्कूल”, “पाटी पर घोटा लगायू छ कि ना”, “चला रे आज स्कूल मा दळ्या बणौण तैं लाखड भि लिजाण बल”, “औ रै रामू फटाफट”। जना कै बोल-बाक बोलदा हमारा गौं का स्कूल्या नौनी-नौन्याळौं कु हल्ला-गुल्ला।

इनै ये रौळा-धौळा मा मगन मैं पिठि परैं दादी कि भताक खै रिट्ट छै त दादी समझौण्यां-समझौदि छै, अरे ब्यटा वु स्कूल्या छिन पार धार पोर ढाब सौड जाण वोन, भौत दूर छ, जब बडु ह्वे जालू त तब तैन भि जाण ब्यटा हें! दादी सजा छ सुणौणि कि जमानै रीत छ बिगौणि म्यरा समझ मा नि औंदि छै। मेरी

दादी को नौ छै पूर्णा देवी पर लट्याळा गौं वाळु कि क्य मजाल कि कभि वोन “पूर्णी बुढड़ि” पर नौ छोड़ि कुछ बोलि हो दादी कू। दादी न्यत्यांण त नि छै पर बांठि -सयाणि खूब छै। घर मा मजाल क्या कि दादी छुंयों-छुंयों मा कर्या फैसला पर भी क्वी रवीं- चवीं करु। हमारि गौंड कि औज्यांण दादी टल्यांयि गुदड़ि मा घटा टोप निंद मा सैरा दिनमान स्ययां म्यरा बाबाजि तैं लबराट कै दादिन गाळि पत्यायिन हे मात “मैमा”, दिन-दोफरु ह्वैग्ये। तुम्हारि मवासि क कनु बिजोग पड़ि। सैरा गौं कुड्या लोग स्यरों चलिग्या, आधा-पाधा रोपिणि लै सकिगिन लोग । अरे खडु उठ दौं। दादी टोकण सुंणि बाबाजि भि उणिंदा आंख्यौं झपकैक स्यरा बाढ लग्या त वू थैं दादी, चुल्हा -चौका करि भैर औकि मेरि मां पर धौतरये, “लिपै- पुतै नि ह्वेलि तेरि मैत्यौं कुड़ि पर हें एक घड़ि-घटौं काम परै सेरु दिन काटलि लैन, जा लाखड़ा ल्यौं अर द्दी कोदलि बणै भट्ये। हे। सरस्वति, भानू ऐ माचु आ बिटाळयांण खा मातो स्कूल नि जांदा आज । भैजी -दिदी सुरबुटकै रोटि खांण



बैट्यां अर मैं भी दाद्या ध्वरा बैठि पुछण भैग्यौं” दादी बिटाळ्याण किलै खांदा “दादिन गुमडाट कै बतै -भूख नि लगदि तबा। “अर भूख कनि लगदि दादी” बस यनु पुछणु क्य थौंकि दादिन मुख्यलु उठै मेरी पोटीगि तरफां हिरै बोली “जब आग लगदि पोटीगा पर”। दादी कु गुस्सा उमाळ देखी भैजी कौं कोदलि उठै खड़ा ह्वैग्या ।

धी कि गोंदगि त र्वटी मा रैग्ये पर गुडै डळि म्यळा फण्डु खत्येगि।

भैर बटि बडिजी भट्येन “हे गुड्डी, हे सरु थोडा यों छोरों भि जग्वाळ्यां बेटी” उनै दादी कु कुकड़ाट” हां नितर क्वै खांणु च त्यरा छोरौ तैं। अर भैर भागदा दिदी - भैजी दगड़ मैं भि चौका दांदा मा ऐग्यो। सज्यां-धज्यां स्कूल्यौं गुमडाट करदा स्कूल जांदा टक्क लै द्यखदि रौं।

पिछनै बटि दादि न चम्म अंग्वाळ मारी खौखला पर उठैयू “हे छोरा कख च चौका दांदा पर खडु ह्वयूं उन्द पड़द पगार उदैं”, लमडगै डेर कै थै मैं किलक्वारि मारी स्कूल जांणे हिंगर

लै ग्यो लांण दादिन भात -दूध मा रैळ खलाई, सैद चटाई पर क्ये मांण छौ मैन। साग-भात मा लोण ह्वैग्ये। अब नि खांदू ,मैं स्कूल जादौं, दिन भर हिंगर रै।

ब्याखुनि दां दादि की कछड़ि लै ग्ये, द्यख लो भोळ बिठि ये चिमिल्डा छोरा न भि स्कूल जांण। झगलु- टोपलि त बणि जाली पर बुह्या सुंणा छिन ये क तै सुबेर सार मा एक पाटी बण्ये द्यया पटेला ओबरा छिन अर तेल -मसु लगै दियां। कुणेंटा पर बैह्या दादा जी न मेरि तरफां देखि मुंडळि हिलै ठीक छ ठीक। निर्णय ह्वैगि थौ। रात भर गैण्यौं गाणिक भोळै तैयार मा रौं।

सुबेर सार अण्ध्यांयं मुख भैजि कौं दगड़ि आधा कोदलि खै तैयार ह्वै ग्यौं। चौका दांदा सि पैत्ये मां जीन तिंदा हाथन मेरि मुखड़ि साफ कैरी “ज बाबा कै दगड़ि लड़ि न वा, टोकर नि लगै वा, अर या खुटौ पर कांडा नि बैठै” अर नि जाणि क्य-क्य बोलदि रै, अर मैं हाथ छुडौदि-छुडौद दूर चलिग्यूं। दादि मा का पिछनै कुझडि क्य बबडाट रै कनी पर माँ टक्क लै उनैइ हेरदि

रै ज थैं हम धार पोर जाणा छा,आज तलै माँ कि नजर मेरि



गजानंद टोपी अर 'वुड़'

बालेन्दु बडोला

य हमर अपनै गौं कि लगभग ४०-५० वर्ष पुराणि बात छ, जब हमरि ही बिरादरी क ढिंडु दाजि कु जवान नौनु मंगलू काका देहरादून क सर्वे ऑफ इण्डिया दफ्तर म चपड़सि क पद पर नौकरि करदु छयु। वे सुनहरा युग म चपड़सि बणणा खुण आज कि तरौं क्वी भि योग्यता तय नि छै, सिवाय यां क कि लड़का कम से कम अठारह साल कु, मामुलि तौर पर साक्षर होण चैदु छौ। तो भि क्वी छोरा सरकरि नौकरि करणा कु तैयार नि होंद छया। फिर भि ढिंडु दाजि कि जिद पर अपनै गौं क एक हैंक चपड़सिन, अपना बड़ा साब क समणि पेश करि कि, मंगलू कि उम्र पंद्रह कि जगह अठारह लिखै कि, जबरदस्ती तै थैं चपड़सि भर्ती करै दे छयु। अर तब ६ महीना बाद मंगलू न छुट्टि म घौर औण कि अपणि मनसा अपना बुबा पर रैबार भेजिकि प्रकट करि दे छै।



बस तभी अचणचकि गौं बटि बुबा कि एक चिट्टि डाक से क्य पौछ कि मंगलू खुण जन ब्दवीं, पेरशान्युं कु फंचु ल्हेकि अगे।

कुशल क्षेम क अलावा गौं गाला क हाल समाचारु पश्चात् आखिर म बुबा कि ल्यखीं डी बातु से मंगलू कि खपरि बुरी तरौं चकरै गे।

पैलि बात- 'ब्यटा छुट्टि म घौर आंद वक्त हौरि चीज्युं क दगड़ि ही गजानंद टोपी जरूर ल्हये।'

दुसरि बात- 'अर हाँ, नौकरि बटि पैलि बार घौर आण कि खुशी म अड़ोस-पड़ोस गौं म बंटणा वास्ता चणा लैची दाणा अर गुड़-वुड़ ल्हाणु भि न भूला।'

मंगलू तैं दुसरा दिन ही घर का वास्ता शाम बख्तै गाड़ि पकड़णि छई। वो सबेर हि झटपट तैयार ह्वै कि, दुकन्युक खुलदा हि अपण बुबा कि मंगई चीज्युं तैं खरीदण खुण बजार जनै गे।

हौरि सभि खरीदारि करणा का बाद वैन दुकानदार तैं पूछ "लालाजी, आपके पास गजानंद टोपी है?" लालन मुंड

हिला घा, "ऐसी तो कोई टोपी फिलहाल अपने पास नहीं है, भैया"- ब्वलण क दगड़ै वैन मंगलू थैं घूरिकि भि द्याख कि यो क्य आदिम छ!

"वुड़ तो होगा?" मंगलू न फेरि पूछ।

"वुड़? वुड़ तो नहीं। हां, गुड़ कहो तो दे सकता हूँ" लालन जवाब दे, "नहीं, गुड़ तो मैं खरीद चुका हूँ" मंगलू न बोलि, "बस वुड़ ही खरीदना बाकी रह गया है।"

तब असमंजस म प्वड़यूं लाला अपणु मुंड कन्याण लैगि अर मंगलू बजार म अगनै बढि गे।

मंगलू ब्यट न देहरादून कु सरु पल्टन बाजार छण दे, पण क्वी दुकानदार वै तैं गजानंद टोपी अर वुड़ नि दे सक्या।

आखिर कार एक आदिम

न वै तैं सुझाव दिने कि शहर क चुकखू मुहल्ला म एक लाला रोशनदास रहंद। वो भौत चालाक च, अर सबु कि समस्यौं थैं चुटकि बजादैं हल कैर दीद, तू भि वे कै पास जा काम बण जाण।

मंगलू न लाला रोशनदास कि दुकान पर पौछद हि बड़ी व्यग्रता से वै पर अपणु पैलु सवाल झोंक दिने, "लालाजी, गजानंद टोपी मिल सकती है?" "लाल जीन परखी अर तत्काल चितै ग्याई कि टोपी जरूर कै गजानंद नाम धारी मनखि क वास्ता चैदि ह्वैलि, जां थैं यु सीधु सादू लड़का समझ नि पाणू च। तैंन तुरंत हि डेढ़ ईच मुस्कान अपना होंटु क खैंचि कि बोलि, "गजानंद टोपी ?..... हाँ-हाँ, मिलेगी कैसे नहीं भला! अभी लो।"

इतगि बोलिकि लाला भितरखण्ड गाइ, अर वख बटि एक जरीदार किशती नुमा टोपी ल्हे आइ। "यह लो जी, ये रही गजानंद टोपी! मुश्किल से यही एक बची थी, शायद तुम्हारे



ही भाग्य से। वर्ना गजानंद टोपियां तो अब जयपुर से आना ही बंद हो गई हैं।“

”क्या दाम दूं?“ खुश ह्वेकि मंगलू न टोपी थैला मा कुच्यांद पूछि।

”सिर्फ ५ रूपये“ लाला रोशनदास न सहज भाव से बोलि।

”तो फिर आपके पास ‘वुड़’ भी जरूर होगा, लालाजी?“ हर्षित ह्वैकि मंगलू न फेरि पूछि।

”हाँ जी, हाँ। क्यों नहीं, पहले ही क्यों नहीं बताया तुमने? हमारे पास तुम्हें मच्छर की मूँछ से लेकर लंगूर की लेंडी तक सब कुछ मिल सकता है। बस, हुकम करने की देर होती है“— अब कि बार लालान पूरी द्वी ईच लम्बी मुस्कान दकड़ि अपणु एक टुट्यूं दांत भि झलकांद बोलि, ”भैं अभी वुड़ को भी खोज कर दिये देता हूं, पर हाँ, किसी को दिखाना या जिक्र मत करना। वर्ना और लोग भी मांगने लगेंगे और ‘वुड़’जैसी दुर्लभ चीज की पूर्ति करना मेरे लिये परेशानी का कारण बन जायेगा।“

मंगलू न कृतज्ञ होंद बोलि, ”अजी मुझे क्या पड़ी है किसी से जिक्र करने की, चुपचाप ले जाऊंगा। किसी को भनक तक नहीं लगेगी। आप बेफिक्र रहें।“

तब लाला रोशनदास न क्वी तरल पदार्थ से भवरीं एक बोतल ल्हैकि मंगलू तैं दिनै अर वे भग्यान सस्ता जमन म भि वै से - गजानंद टोपी अर वुड़ -द्वी चीजु क पूरा दस कळदार (रूप्या) ऐंठ दिनें। (जो आजकल का ५० रूप्या से ^{vv}

भी जादा ह्वाला)

मंगलू भौत खुश ह्वै कि चल घा। शाम गाड़ि म सोचण लैगि- ‘जब मि इनी दुर्लभ अर मंहगी तैं अपणा बुबा थैं दिखौलु, त सो गद्गद ह्वै कि म्यरि पीठ जरूर टोक घालु कि शाबास ब्यटा तिन त कमाल कैरि दे!’

गौं पौंछि कि अन्य सामान क दगडि मंगलू न बडी शान से अपणा बुबा क ऐथर टोपी अर बोतल धरि दे नि। तब बोलि, ”य च गजानंद टोपी अर यो च तुमरु वुड़। द्वी चीज इतगा मुश्किल अर मंहगी छन कि तौं क हि दाम पूरा दस रूप्या देण प्वड़ी।“

टोपी देखि कन अर बोतल खोलकि सुंगण क बाद मंगलू कस बुबा-बुडूच ढिंडु दद्दा-फटकरे कि रैग्या। वैन बोलि, ”अबे, निरभाग ब्यटा, तुत निण्ट मूरख चपड़घण्ट छै रे। तिन अगर जरा भि अकल लड़ै दे होंदि त दुकानदार त्वै से इतगा ज्यादा रूप्या नि झटकिक सकदु छौ। अरे, मिन त तेरा भतीजा गजानंद खुण टोपी मंगाई छै। पण लगणू च कि शैत मि गजानंद अर टोपी क बीच ‘खुण’ लिखण से चूकि ग्युं। बस, तु वां थैं ही क्वी खास किस्म की गजानंद टोपी समझिकि ख्वज्याण लैगि।..... गुड़ का वास्ता भि मि बोलचाल की भाषा म गुड़-वुड़ लिख घा छौ। अर त्वै बल्दनाथ न वुड़ थैं भि क्वी नई चीज समझि दे।“

”एक मामूली टोपी थैं ‘गजानंद टोपी’ बतै कि काइयां

HAPPY DIWALI

**New Beauty Dyers &
Dry Cleaners**

Rafoo, Charkh, Fall, Piko, etc.

Ladpur, Raipur Road, D.Dun Ph.- **0135-2780942**

Pro. KISHAN LAL



तीन छ्वाटि कविता

गिरीश सुन्दरियाल

एक : राजनीति

हमर यखा लोग
स्वरोजगार
इलै नि करदा
किलैकि कवी बिचरो
अगर कुकड़ा पल्द
त वेको ही स्वारो
बिरलो पाळ देंद।



तीन : इक्कीसों सदी को बालक

ब्याळि हमर गौं
एक मौ को नौनू ह्वे
पर कुनश ह्वे!
वेका एक हथ पर मोबाइल
अर हैंका हथ पर माउस छौ,
वो हूणा बाद
रूवै नी!
हलो-हलो ब्वनू छौ,
कवी ब्वनू
वेकी पीठि पर
एक गरौ बस्ता टग्यूं छौ
अर वो रुंदा-रुंदा
होमवर्क-होमवर्क ब्वनू छौ,
बाजा-बाजा त इन बि ब्वना
कि वो इन्टरनेट द्वारा अफुखुणि
दूधै बोटल मंगाणू छौ।

द्वी : डुट्याळ

डुट्याळ
हमर गौंका
जिमदार
थोकदार
शौकदार
फौंदार
अर हम
अपणा गौं का
गलादार!



चिट्ठी

विजय कुमार 'मधुर'

(एक)

देसि गुरूजि तैं
नि होणि
यखा आबो-हवा सूट
मेडिकल द्वी मैना
हौरि बढै यालि
हैंका गुरूजि न
काटयलि यख
तीन साल
रिटणा छन
जुगाड़ मा अपणा
ध्वार देहरादून का,
इंत्यान मुंड मा छन
घौर आ जयां
गेस पेपर ल्येकी
द्वी-द्वी सेट
एक फलैंग आण पर
भैर चुलै बि दयूंलू
त तुम दुसरु
पौंछे देल्या
भुल्यां न भारे!
तुमरै सारा बैठयूं छौं



(द्वी)

भैजी! समन्य
तुमन समझौं मी
जब तिन
हाईस्कूल कैरि यालि
त इण्टर सैंस
किलै नि करणू छै
मिन तुमरि बात मानि
ले दया एडमिसन
पण भैजी
आज पूरा छः मैना ह्वेगेन
सैन्स कि क्लास लग्यां
प्रिंसिपल साब तैं
भी फुरसत नी नेतागिरि बटै
रोज पौंछ्या रंदि
विधान सभा
मंत्री बणणा का बि
चांस छन बला।





त्वे

विजयेन्द्र चन्द्र कुमाँई

नौ मैना तेरि पुटगि पर रैकि यी दुनियां मा आयो,
 सदनि तेरि खुखली पर ख्यन्नु रायो।।
 सिंचणी रौण मैं सणि तेरा आंसू कि बौछार
 टकटकू बणैगेन तेरा दूध की छलारा।।
 तेरा प्यार कि फैकळि लिपटीं रों सदनि
 मेरू मुण्ड तेरि खुट्ट्यों मा झुक्यँ रौ सदनि।।
 माँ तु चन्दनै डालि गुरौ सि लिपट्ट्यों त्वे पर,
 तेरि खुशुबू फैली बथौं बणी दुनिया पर।।
 तेरि आख्योन् मैं उज्यळु दिखै।
 तेरि जिब्यान मैं इन्सान बणै।
 तेरि सेवा कन्नौ तै मैं प्राण भि त्याग द्यो।
 हर बार तेरि प्वटगी सि फिर जम्म ल्यो।

पापी पराण

चिन्मय सायर

लद्वड़ पुटग
 घुरदी, जब
 भूखक् भूख-बाघ-सी।
 घुळ जांद आदिम
 अपुडो
 आन-ईमान
 जात-पात
 धरम-करम.....
 बस,
 एक ही चीज
 घूळि नि सकदु
 वो
 पापी पराण!

चिट्ठी

राकेश भट्ट

कब्बि घर, कब्बि परदेश बिट्टी
 कभि खट्टी त कभि मिट्टी!
 कुजणि कतनै उकाल उन्दार हिट्टी
 अपणों कि याद दे जांदी रिंगि रिट्टी
 नौनी तै झगुळी नौना तै सिट्टी
 बरखा नि ह्वे कई मैनो बिट्टी
 अब ज्यादा क्य लिखण दंदोल नि मिट्टी।
 चिट्टी! कब आली मेरा पहाड़ बिट्टी।



पाणी चौख्वड़ि पाणी

मदन मोहन डुकलान

पाणी चौख्वड़ि पाणी देखिक
आख्यूँमा सुखिगे आख्यूँक पाणी
मैत अर सैसुर डुबिगे
टीरी मा डुबणि जिकुड़िक गाणो

रुके गंगा की धार, पाणी टीरी बज़ार
घन्टाघर अर रज्जा का दरबार मा
पुरखों की थाती, या जैजाद सारी
या डंड्यळि-तिबारी, समाणी च पाणी मा
तीन धारा तैं येगे यो पाणी

आँख्यू मा

परजा कि खैरि सुमन को बलिदान राला अमर अब,
इतिहास बणिगे

दरबारे धौंस अर रज्जों का ठाठ
सब राज-पाट स्यो टीरी मा डूबिगे
गीतों मा राला राज्जा-राणी
आँख्यू मा

रजधानी दिल्ली भोळ जगमगेळि
उजाडिकि हमारा गौं -बौण थौळ
मुखड़ि अर्धरि करिके हमारि
बांटलो उज्यालो यो पाणी भोळ
जपगा लगाली तब हमारी स्याणी
आँख्यू मा

भ्यंटुलु त्वे भयंटुळु, कख बिटे द्यखलू
बचलू नि बचलू, अब त्वे बिगेर मी
यो जीवन च पाणी अर दुन्या बि पाणी
देखा यो पाणी, पाणी मा मीलिगी
किले आँख्यूमा सुखणू आँख्यूक पाणी
पाणी चौख्वड़ि

आज को जागर

नेत्र सिंह असवाल

जिकुड़ि मा जड़घण्ट-सी फरकीं छई माई!
डौंड्या त नरसिंह छायो,
डौंड्या की भी ब्वे छई माई!

बीस सूत्री किलक्वार नारैणी!
हिरं प्वटग उँदा चाला प्वड़िगीं
कनक्वे भटगौं, कुर्सिं थैई
एक-सूत्री छई माई!

रेडु वाचा, टी० वी० वाचा,
घोर वाचा अघोर वाचा
को छ सच्चो, को छ झूठो!
फगत तेरो गुणगान माई!

संसद का चौक मा
तिल कन पिल्लट छिड़की द्याई
विपक्षी दैत दल,
सरसु-सम सफाचट्ट माई!

बेरोजगारी कू भैरों, रांकु बालीऽ
धुरपली हलाँदऽ
मैगै कू डौंड्या पंकाद खिचड़ी
हमरि ख्वपरि मा माई!

सहस्त्रों मनख्यूं का रक्त ला भी
त्यरो खप्पर नी भ्वर्याई,
रक्त की तिसाली ह्वली,
मांस की भुकाली माई!

घूस, हत्या, आत्महत्या, भ्रष्टाचार, बलात्कार
चली तेरी बयालू,

पोड़ि ग्याया जाप तेरो

घनघोर घनघोर सिमसूत माई!

नी थयेंदी माता तेरी बावन बयालू
साइक हे जई माता दैणी हेई जई।
अपणा गीतु की ब्वे मी धुपाणी सुंघौलू
अपणा गीतु ला त्वेई, कैलासू पौँछौलू।
साइक हे जई माता, दैणी हेई जई।।



(ईंदा पुराणि कलम मा प्रस्तुत छ गढ़वाळि का महान साहित्यकार स्व. श्री चक्रधर बहुगुणा की एक रचना वुंका कविता-संग्रह “नौबत” बटे)

दीवा! कख पिने त्वैन
अमर स्वरग पाणी?
पाये क्या जोत बतौ
मोतियों कि खाणी?

सूरज जब डूब जांद
अन्धकार खूब छांद,
तेरा मुख जोत भाँद
डल-बलाद पाणी।।

बाली क देह आप
फैलौंदी तू प्रताप
तेरी जग बीच छाप
बणी रहण आणी।।

बत्ती जो बणद एक
वह कबास भी छ नेक
धुणियां कद भिन्न जैक
फट्यै देंद ताणी।।

तेरो वह तेल मीत
साथ देंद जो पुनीत
पैले तप कै अपवीत
पिसे जांद घाणी ।।

दीवो बणदी लुटेक
मार खैक औ पिटेक
भट्टी चढिकी फुकेक
क्वसड़ि या निमाणी ।।

पण्डित की होंद शान
देवतौं का ठांव मान
राजौं का घर गुमान
दिवा त्वै पछाणी।।

जखमां दुख बुस्यै जांद
चमत्कार नयो लांद
गाणी पनपेद जांद
सिद्ध होंदि धाणी ।।

घर को उद्योत कोत!
को हुलास को छ सोत
माला को चम्म पोत
तू, कि घर की राणी?

मारो क्या क्वीन छील
तेरो गुणा ई छ शील
ढूँडा क्यां कू दलील
देश मुलक छाणी?

तप को ज्युंदो प्रभाव
पुण्य की छ पुलक आव
दीवा की लौ कि ताव
त्याग की निशाणी ।।

दीवा क्या पिने त्वैन
अमर स्वरग पाणी
पाये क्या जोत बतौ
मोतियों कि खाणी?



मैं यान्त्रिक युग को पैलो गढ़वाली गायक छौं : जीतसिंह नेगी

(कुछ दिन पैलि साहित्य अर संस्कृति की वर्तमान स्थिति का सम्बन्ध मा गढ़वालि का वरिष्ठ गीतकार श्री जीत सिंह नेगी जी दगड़ “हमारि चिट्ठी” की बा. तचीत ह्वे। बातचीत का प्रमुख अंश हम साक्षात्कार का रूप मा प्रस्तुत कर्ना छं। “हमारि चिट्ठी” की तरफ बटे नेगी जी दगड़ बातचित कर्ना छन - आशीष

आ सु. - आप बरसु बटे गढ़वालि साहित्य, समाज अर संस्कृति का वास्ता काम कर्ना छन। आपै या साहित्यिक सांस्कृतिक जात्रा कब अर कन मा शुरु ह्वे।

जी. सि. ने.- शुरु मा जब मैं बर्मा मा छौ-मैं हिन्दी फिल्मों का गीत सुणदो छौ। के.एल. सहगल आदि का रागों पर आधारित गीत मैं तै पसन्द छया पर जब मैं संगीत सिखणा वास्ता बम्बई मा एक गुरु का पास गौं त वून मैं तैं अपना इलाका वास्ता काम कर्ने सलाह दिने वूको ब्वनो छौ कि हिन्दी मा त भोल तुम एक जुगनू की तरौ चमकिल्या पर अपना इलाका का वास्ता काम करिल्या त चोंद जना चमकी कै सैरा मुलक तै

करदा छा पर जब सन १९४६ मा मैंन गढ़वालि गीत गाणा शुरु कैन वे समै पर एक तरा से यान्त्रिक युग की शुरुवात ह्वेगे छयी अर गीत/संगीत का प्रोग्राम ग्रामोफोन रिकार्ड का माध्यम से समाज का बीच पौछण लगीन! मैं से पैलि हिन्दी अर अँग्रेजी मा त यो काम शुरु ह्वेगे छौ पर गढ़वालि गीतों को पैलो ग्रामोफोन रिकार्ड मेरा गयां गीतों को बणे आप यो बोलि सकदां कि मैं यान्त्रिक युग को पैलो गढ़वालि गायक छौं।

आ. सु. आप लम्बा समै से गढ़वालि समाज का वास्ता काम कर्ना छन येकी प्रेरणा आप तै कख बिटे मिले।

जी.सि.ने.- मैं तैं काम कर्ने प्रेरणा मेरा समाज से हि मिले

गढ़वालि



साहित्य समाज अर संस्कृति का मर्मज्ञ वरिष्ठ लोक गायक श्री जीत सिंह नेगी को जन्म 2 फरवरी 1927 खुणै ग्राम- अयाळ, पट्टी- पैडुळस्यँ, पौडी गढ़वाल मा ह्वे। नेगी जी बचपन मा ही अपना पितजी श्री सुल्तान सिंह नेगी, जो ब्रिटिश फौज मा छा- का दगड बर्मा चल गैन प्रारम्भिक शिक्षा बर्मा मा ही ह्वे वेका बाद डी.ए. वी. हाईस्कूल पौडी गढ़वाल अर डी.ए.वी. कॉलेज देहरादून बटे नेगी जी न अपणि अगनै पढे लिखै पूरी करे। नेगी जी न अपना साहित्यिक जीवन की शुरुवात सन 1942 मा पौडी मा नाटक-मंचों से स्वरचित गढ़वालि गीतों का सस्वर पाठ से करे। येका बाद सन् 1949 मा यंग इण्डिया ग्रामोफोन कम्पनी, बम्बई बटे छः गढ़वालि गीतों की रिकार्डिंग से नेगी जी का साहित्यिक जीवन की मजबूत पौ पडे। श्री जीत सिंह नेगी न गढ़वालि गीतों का अलावा गीत-नाटक, एकांकी नाटक आदि की भी रचना करे। नेगी जी की प्रकाशित रचनाओं मा गीत-गंगा (गीत संग्रह) जौळ-मंगरी (गीत संग्रह) छम घुंघुरु बाजला (गीत संग्रह), मलेथा की कूल (ऐतिहासिक गीत नाटक), अर भारी भूल, (सामायिक नाटक) प्रमुख छन जबकि जीतू बगड़वाल (ऐतिहासिक गीत नाटक), राजू पोस्टमैन (एकांकी) अर रामी (गीत नाटिका) अबि भि प्रकाशन को बाटो ह्यरणा छान श्री जीत सिंह नेगी जी का नाटक भारी भूल, मलेथा की कूल, जीतू बगड़वाल, रामी, राजू पोस्टमैन भौत लोकप्रिय हवीन् अर यूँ नाटकों को कतनै जगा अर कतनै बार मंचन ह्वे।

गढ़वालि गीत-संगीत अर साहित्य-संस्कृति का टुल्ला रागजग्वल्या तै गढ़वालि समाज न भि भरपूर सम्मान दे अर अखिल गढ़वाल सभा देहरादून हिमालय कला संगम देहरादून, गढ़वाल भ्रातृ मण्डल बम्बई, उत्तर प्रदेश संगीत नाटक अकादमी लखनऊ, नागरिक

रोशन करि सकदा। बस! तब बटि मैं अपना गढ़वालि समाज का वास्ता का काम कर्न बैठिग्यौं।

आ. सु. - जब आप न शुरू-शुरू मा गढ़वालि गीत गैनि, वे दौर का बारम कुछ बतावा

जी. सि. ने. - पैलि सरया संसार मा सांस्कृतिक/ साहित्यिक लोग अपनी कला को प्रदर्शन राज घरानों मा आयोजित कार्यक्रमों मा, बड़ी-बड़ी महफिलों मा या थौळ मेला आदि माध्यमों से

कला-साहित्य प्रेमी मैं दगड़ जुडीन् मैं से सिखण लगौन् त मैं न एक टीम बणै दे अर फेर लोकगीतों/लोकनृत्यों का कतनै रूपों जनकि थड्या, चौफळा, जागर आदि तैं एक दगड़ गच्छैकि गीत नाटिका, नृत्य नाटिका का रूप मा प्रस्तुत करे। गढ़वालि समाज का लोगुन याँकी भरपूर सराहना करे। मलेथा की कूल, जीतू बगड़वाल, रामी जना गीत-नाटकों को कतनै जगा अर कतनै बार मंचन ह्वे।

आ. सु. -आपै साहित्यिक/सांस्कृतिक जीवन से जुडी कवी खास



घटना जैको आप यख मा जिक्र कर्न चाँदा।

जी. सि. ने. - : हाँ। एक बार मैं बम्बई मा अपना गढ़वाळि लोगों का बीच गीत लगाणू छौ-सौण भादों का बादल सूणा, बरखा नि कर्यां मिल मैत जाणा-ये गीत मा एक नौनी को जिक्र छ जो सासु का अत्याचार सैणी रँद-ये गीत सूणी कै एक बुड्या जोर-जोर से सब्यों समणि रूण बैठिगे, मैं न अपना हारमोनियम रोके पर सब ब्वन लगीं गावा-गावा त मैं फेर गाण बैठिग्यूं पर प्रोग्राम खतम हूणा बाद मैंन वे बुड्या तै पूछी कि तूम किलै रूण लग्यां त वेन बोले कि मेरी एक नौनी छयी जैन सासु का अत्याचार से तंग आके गाड़ फाळ मारि दे। अर तब बटि मैं आज तैं घौर नि गैं। वे बुड्या की या घटना मैतै आज भि याद छ।

आ. सु. - आप का शुरूवाती समै का गढ़वाळि गीत - संगीत अर आज का गढ़वाळि गीत-संगीत मा क्या फरक छ?

जी.सि.ने- वे समै का मेरा गीत सीधा लोक जीवन से सम्बन्ध रखदा छ जबकि आज का गढ़वाळि गीतों को यों चीजों से क्वी सम्बन्ध नी छ पर यामा सिरप कलाकार को कसूर नी छ लिखण गो त वो भि मनोरंजक गीत हि छ पर ग्हरै मा नि जाणो छ किलैकि वो गढ़वाळ की मिट्टी से परिचित नी छ अर फिर श्रोता भि इन्नी छन। गढ़वाळ का लोक जीवन का बार म् कै तैं भि कुछ खास पता नी छ।

आ.सु. - आज बजार मा गढ़वाळि सी.डी. वीडियो एल्बम आदि की भीड़ लगीं छ ये विषय मा आप क्य ब्वलिल्या?

जी.से.ने.- ये सी.डी., एल्बम बणाण वळा सिरप व्यापारिक अर व्यवसायिक दृष्टि से काम कर्ना छन पर यों से चला कुछ श्रोता त बढ़णा छन। लोग गढ़वाळ से दूर रैकि भि गढ़वाळि तैं सुणणा त छन पर यख मा हमारा लोककलाकारों की जिम्मेदारी छ कि वो अपना लोकगीत/संगीत का मूल रूप तैं बचैकि रखीन् अर टेट गढ़वाळि चाल ढाल अर शब्द श्रृंगार से अपना गीतों तैं सज्येन्।

आ.सु. - आपन 'मेरी प्यारी बोई', 'समौण' आदि गढ़वाळि फिल्मीं मा भि गीत लेखन करे यो अनुभव कनो रै?

जी.सि.ने- 'मेरी प्यारी बोई' सुन्दर फिल्म बर्णी छ पर आज सिनेमा हॉल मा दर्शक कम छन, सी.डी. को प्रचलन जादा छ पर लोगुंन मेरा लिख्यां गीत पसन्द कैनि अर निर्देशक मेरा गीतों से बिल्कुल सन्तुष्ट छ।

आ.सु. - आज गढ़वाळि रंगमंच की क्य स्थिति छ?

जी.सि.ने. - आज गढ़वाळि रंगमंच फीको पडिगै। न त आज मंच पर काम कर्न वळा कर्मठ कलाकार रैग्या अर न वूँ मा क्वी लोकजीवन से जुड्याँ खास विषय छन। रंगकर्मी जमना का हिसाब से अपना आप तै नि ढाळि सका।

आ.सु. - आज वरिष्ठ साहित्यकार/गीतकारों मा आपौ नौ सबसे ऐंच छ ये मुकाम पर पौछी आप तैं कन लगद?

जी.सि.ने.- मैं तैं मेरा समाज से भौत प्यार मिले सम्मान मिले आज भि भला कामों मा मैं तै पूछे जाँद कतनै जगा मैं कार्यक्रमों मा निर्णायक का रूप मा शामिल हूँ। बम्बई की जनता न् मैं तैं गढ़रत्न को सम्मान दिने, यो सब देखी बड़ि खुशि होंद अर काम कर्ना खुणे ऊर्जा मिलद।

आ.सु.- एक बबाल अजगाल गढ़वाळि लिपि तैं ल्हेकि मच्यूं छ ये विषय मा आपा क्य विचार छन?

जी.सि.ने. - गढ़वाळि की अलग लिपि की बात कर्नो बिल्कुल बकबास छ। यों से गढ़वाळि भाषा बोली तैं समझण-लिखण-पढ़ण हौरि भि मुश्किल हवे जालो। हम तै अलग लिपि की क्वी जरूरत नी छ देवनागरी लिपि मा हि गढ़वाळि लेखन को काम हूणो रै अर हूणो रालो।

आ.सु. - नै छ्वाळी का वास्ता आपौ क्य रैबार छ?

जी.सि.ने. - नै छ्वाळी का कलाकारों तैं गौं-गौं मा जैकि पहाड की लोक संस्कृति का वूं जणगुरुं जौका पास लोक साहित्य को बिजां भण्डार छ अर धीरे-धीरे वो विलुप्त हूणो छ इना लोगु का बीच जैकि लोक जीवन अर लोक तत्व तै बिटोळी कै लोक गीतों की रचना कर्न चयेंद। सिरप यख बैठिकि सी.डी.- कैसटों मा देखिकै पहाड़ को वर्णन नि करीन्।



‘सीख’ पर आज तलक भौत बहस बाजी ह्वेगे। कैन बोलि सीख बिना ठोकर लग्यां नि मिल्दी। मन मा य बात उठी कि पैली ठोकर कै पर लगी होली। देबौं पर कि रागसू पर?

हमुन् अंदाज लगाई कि रस्ता चल्द-चल्द हूंगे ठोकर पैली एक मन्खी पर लगी होली। अगर वेका पैथर तै रस्तम् वेकू क्वी खास आणू रै होलु त वेन वे तैं चितलू करी होलू। पर अगर पैथर क्वी दुश्मन हिटणू रै होलू त वेन किनरा पर लूकी वे पर ठोकर लगदी वेकी पीड़ै बबराट पर थूक घूटी टपकरा लहे होला।

ठोकर लगणा बाद वेका दुश्मन न पीड़ा कम होन्द तक हूंगा रखदरा चटेली गाळि दे होली। अगर वु ठोकर खन्दरू थुड़ा चकड़ैत रै होलु त वेन सैळी पोड़दी वी हूंगू रस्ता बीचों-बीच धार दे होलु। इखी बटिन देक्ता अर रागसा लक्षण गैरा तक मन्ख्या घटप्यन्नम् बैठी होला। इन मेरो दिमाग मा भिज्यूं च।

फिर मार-फौंदरी ह्वे कभी देक्ता पितेन कभी रागसा। तीर-तलवार-त्रिशूल, गजमुंगरौन पुराण भुर्यौं छन। इखमी एक फुन्द्या देबौं अर रागस्वा बीच मा कूदी। वेन दुयूं मा अलग-अलग खुफसाट करी - मी तुम तैं जितणैं तरकीब बतौलु। तरकीब सुणदी पैली वेका पैथर-पैथर एक जंगल मा गै। तैन तरकीब सीखी। तैन बाणन् शब्द भेदण शुरू करनी। आंखा बूजी सुदी हवा मा तीर चले त नुकसान त कखी न कखी होण्वी छौ। श्रवण कुमारा ब्वे-बुबा तिसळा त छुटी छन् पर मवशी भी घाम लगी। ब्वे-बुबा एकी जगा मा बैठया रै गैनी। तीर चलन्दा बड़ा आदिम छा। तौंकू न गौं फौंटी ह्वे न पणछ्युंदू। लिखदरौन् इन लिखी जन कि क्वी बड़ी बात नि ह्वे हो।

तरकीब सिखदरा मन्खी बढनी त तैन उड्यार बटिन

भैर ऐकी छप्पर डाळ दे। एक छप्पर छुटू ह्वे, त एका द्वी, द्वी का चार ह्वेनी। जंगल-जंगल छप्परून् भरे गेनी। कखी-कखी कीलों पर बाँधी दुधाळ गौड़ी रमण बैठ गेनी। भ्यार गाळी-मगाळी मार-काट मर्ची छै, उनै वू जंगल मा या डिसणा मा सियां छा। जै डाळा छैल बैट्यां छा वे का फौंका हिलैकी फल, फूल अर लखड़ा टिपणौं रैनीं



अब सुणा ! द्रोणाचार्य नौ का एक इनी छप्पर वळा छा। तौंकी संगत-सौबत ऊँचा खानदनु तक छै। तौंका छप्पर तौळ खानदनी लोग्वा हीरा-मोती हेंसण-कुदणा छा। द्रोणाचार्य तैं झुमल्या-तुम्ल्या बिल्कुल पसन्द नि छा। एकलब्यन आसीरबाद माँगी पर द्रोणाचार्यन अपना खुट्टा पैथर खैंच देनी। एकलब्य लैकबन्द छौ बिचरन अपना हाथ खुट्टा चलाण नि छोड़नी। बिना गुरु कु मास्टर बण्द भी लोगुन पैली दा सूणी।

खानदान्युं कु कुकुर भी तबरी जंगल मा अकड़ी चल्दू छौ। शेर बाग भी तै देखी डरदा छा। गूणी बान्दरूवी त औकात ही क्य छै ! पर जब स्यू कुकुर खबड़ा पर तीर फॅसे की क्यूकांद-क्यूकांद तौंका छप्पर तौळ पौंछी, त खानदान्यू दगड़ा द्रोण ाचार्य भी खबड़ा-कताड़ी हक्का-बक्का रै गेनी। अर्जुना तमगा पर मूजा पड़ गेनी। जैकी छत्ती पर धनुर्धर्या तमगा लगण छा वू भी तै ही जंगल मा भटकुणू छौ। वेका बाद द्रोणाचार्यन् क्य तिकड़म चली सेरी दुन्या तैं पता च। पर कैदा त यू बोल्दू कि कैकू गौळू काटा, हाथ काटा चा अंगुलु। जुर्म त छई छौ।

हमरी सी बात होंदी त, हुक्का-पाणि बन्द करी द्रोण ाचार्य तैं इखमी छोड़ देंदा। कि भै! तू जा अपणू महाभारत अफ्री लिखली। पर ब्यास पौंछी चीज छा। द्रोणाचार्य तनी फॅसदी रैनी। कैन सुदी हवा मा चले दे कि द्रोणाचार्यो नौनू भीड़ मा हर्ची गी। बस फिर क्य छौ बीचा द्रोणाचार्यन् ऐन-मौका पर



हाथ खुटा छोड़ देनी। तिमला-तिमला भी खतेनी अर नग्या-नंगी भी दिखेनी।

भयू ! ई तरकीब बतलन्दरा नि होंन्दा, त नत, रामचन्द्र जी जंगलू मा भटकदा, न सीता चुरेन्दी, न वे जमना मा समोदर मा पुळ बणाणै जरोरत पड़दी। राबण जनु विद्वान आदिम भी नि मरेन्दू। कंस तैं अगर क्वी उल्टी-सीधी छ्वीं नि सुणादू त एकी राश्या ममा-भंणजा दुश्मन भी नि बणदा। सकुनी जनु बिचो आदिम नि होन्दू त कुटुम्ब मा महाभारत नि जुटदू। यू बीचा नि होन्दा त भिष्म तैं बुढ़ेन्दी दां नुकीला बाण्वा डिसाण मा पराण त्यचागण पड़दा? धृतराष्ट्र जना अन्धा आदिम तैं बीचों आदिम पूरू महाभारत बिगैगी। तरकीब सीखी त्रिशंकु बीच असमान मा फँस्यूं च। साख्यूं बटिन बीचा हमतैं इनी लसोड़णों छन। अर हम अभी भी तरकीब सिखणू बीचा खुजाणा छ।

आज भी छप्पर वळों की रूटी-पाणी मा क्वी अन्तर नि आई। जब चकड़ैत्वा रौ-भौ देखी जंगल मा स्यू गौर-बछरा पळण वळा अपणा हाथु पर मौळे गन्ध चिताण बैठ गेनी। त गौड़ी बेची तौन घोड़ा बाँधी। दूध, पाणी, साग-भुज्यूं जिम्मा गारजन्वा मथी पड़गी। जैन तैं तरफाँ बटिन मुख मोड़ी वेका नौनो का औलणों का चट्टा लग गेनी।

ब्वे-बुबान बोली मास्टर जी ! छोरा अगर पढ़े पर ध्यान नि देणान् त तौंका कमर तोड़ द्या। कमर त कैका नि टूटनी। पर तौंने असन्द जरूर गाड़ दे। भिमळे सुटगी टुटण बैठनी। छोरोन कूणा-कुमच्यरों, डाळि-बोट्यूं का पैथर लुकुण शुरू करी। कुछुन् ई मुसीबत से बढ़िया भाभर उन्द होटलु मा भांडा मंजाण सै समझिनी। जब गुण्यो कपाल मा कुटुळजड़े लगी अर ल्वे का धारोन बरमण्ड भीगी बुद्धि हर्ची। तब जैकी ब्वे-बुबौन बोली भै! औरी धणी त फुण्ड फुका। नौनौ इथा नि मारा तुमरी पढ़े-लिखे जावु रगड़घूस मा। हमरा लाड प्यारा छोरा छन। बच्च्यो राला त गोर चराला।

कुछ दिन तक तौंन माटू बुखेकी तकळी चलै। विद्या तकद-तकद तकली पर जब तनख्वा अर घरगिरस्थ्यू जंजाळ अल्जी, त विद्यास धागा पर खैड़ा, लत्ती, चबत्ति, कंडल्या झमाइयाटे गेड़ी पड़ गेनी। गार्या कपाल मा पैली एक खैड़े लगी फिर पूछी बतौ रामा बुबो नौ क्य छौ? ऐथर-पैथर मारन् गारी सब भूलगी। स्यू जग-बक कन लगी। फिर एक चबडति लग की पूछी सोर का बच्चा तेरा बुबो नौ क्य च? रोन्द-रोन्द गारिन बोली -दशरथ ! पर हम तैं पता च तैका बुबो नौ भूलगी। जू हाल यून उबरी एकलब्या कनी वी हाल ब्याळि गुण्यो छ आज गार्या भि वी हाल होणा छन।

vvv

दीपावली अर
ईद की शुभकामनाओं का ढगड़



राजेन्द्र नगर, बी.एस. नेगी मार्ग
कौलागढ़ रोड़, देहरादून




घळचाघण्ट

प्रीतम अपछ्याण

प्राईमरि स्कूल मा प्रार्थना होणी छै। मास्टर जि अैथर खड़ा छ अर भैनजि नौनों का पिछनै। जनि दैनिक प्रतिज्ञा निम्डे एक नौनान् नारा लगाये -भारत माता की, सबून बोलि झै। वे का गिचान् भारत त साफ बिंगे नी- भात माता की झै। बगल कि क्वठड़ि बटे एक जनानि आँखा मिरोड़द मिरोड़द भैर अै अर बोलि -भैनजि, आपन् मी थैं बुलै क्या? इ नौना क्य बोना भात माता का गै? वा जनानि स्कूलम् भात पकौण वलि छ। सब वीं कु भात माता बोल्दा छ। गुरुजी अर भैनजि हेंसण बैठ्या। जनानिन् ज्य सम्झि हो, तड़म तीड़िगे।

अरे यूं निरभै छोरों का खातर बिनसिरि बटे तकुळि सि रिटणू छैं। लखड़ा ल्याई, वु बि धुवाण्यां। धुवान् आँखा लाल ह्वेगिना। फुर्र फुर्र फूक मारीक मेरि फूक सर्किंगे। चुल्लु द्याखा रोज भिचोळ देणा छन। खचबच कबि एक दुंगु रड़े अर फुल्लु टम टोठगो। यों खड़्यौणों पोटगि चिरणू मेनत से पकाओ। चौळू का बिंया बिराओ, दाळ का कंकर



छंट्याओ। पाणि सारो, खंदि लखड़ा घोचो अर निहोण्यां मेर्वी ठठा लगौणा। इ गुरुजी अर भैनजि, लाज न सरमा। नौनो थैं डपकौणु छोड़ीक ही ही ही दाँत दिखौणा छन। सड़्यां चौळ मंगै कि भात पकौणा। दाळ कि जगा छंछ्या खिलौणा अर मेरु क्य फैदा? चार सौ रुपया दस खुशामद करीक बि टैम पर नी। मैना भर खिलौणा बाद बि साब-साब कन्न पोड़नू चा। यि निर्गुसैं का छोरा न्यक्क औंदन अबि कतगा देर चा। भात माता भूक लगे। गुरुजी थैं बीड़ि पेंण से फुसंत नी अर भैनजि थैं स्वेटर बुण्ण से। क्वी कखि थकुलि बजौणू क्वी हग-मूत देणू। अर देखो त मेरु ठठा। क्य छैं मि क्य छैं? इन नि बोल्यां मि थैं कुछ नि पता।

मास्टर अर भैनजि कि घळचाघण्ट। नौना डौरन् बड़ि मुश्किल से समझाये-यि त अण्णा देश कि भारत कि जै जैकार कन्ना छ। आप थैं कैन कुछ नि बोले। हमारि तरफाल जनि भारल माता उनि भात माता। दुये हम थैं खिलौणा छन अर

ईद व दिवाली की
शुभकामनाओं सहित

आरजू हैयर कटिंग सैचून

लाडपुर, रायपुर रोड, देहरादून



हमारि चिट्ठी



मुंबई मा गढ़वळि रंगमंच

गजेन्द्र नौटियाल/ दिनेश भारद्वाज

मुंबई महानगर मा पैलि पारसी रंगमंच (थियेटर) भौत चढ्यू-बढ्यू छौ अर अब मराठी अर गुजरति रंगमंच अपरु यौवन पर छ।

ये महानगर मा गढ़वळि रंगमंच की स्थापना बहुत कठण काम च। फिर भी मुंबई मा गढ़वळि रंगमंच की शुरुआत १९६२-६३ मा गढ़वाळ भ्रातृ मण्डल द्वारा एकांकी नाटक द्वारा करे गे जै का लेखक (स्व.) दीनबंधु द्विवेदी छ। तै का बाद १९६५-६६ मा गढ़वाल भ्रातृ सम्मेलन (मुंबई) द्वारा और एकांकी कू मंचन करै गे जैका लेखक (स्व.) जगदीश प्रसाद बलोदी छ। अर ये एकांकी कू नौ छाय "गुलदस्ता" जै मा राष्ट्रीय एकीकरण की भावना छै।

१९६०-१९७० का दशक मा ललित मोहन थपलियाल द्वारा रचित 'खाडू लापता' का कम से कम आठ बार मंचन करे गै अर हर बात दर्शकू ल ये की सरहाना करे। ये का दगडि ललित मोहन थपलियाल द्वारा रचित "घर जवै" अर "एकीकरण" कू भी मुंबई मा सफल मंचन गढ़वाल भ्रातृ मण्डल का तत्वाधान मा करे गे।

१९७३-७४ मा अलकनंदा का बैनर मा राजेन्द्र धस्माना द्वारा लिखित "अर्धग्रामेश्वर" नाटक कू मंचन दिल्ली की कलामंडली द्वारा करे गै जो हर दृष्टि से उत्कृष्ट नाटक छै।

१९७५-७६ मा स्वरूप ढौडियाल द्वारा रचित "अदालत" अर "मंगतू बौल्या" कू मंचन भी मुंबई मा ह्वे। यूँ कू कथ्य अर पृष्ठभूमि पूरी तौर पर गढ़वाल पर आधारित छै। यों द्वी नाटकों की प्रस्तुति भी दिल्ली का कलाकारु द्वारा करे गे।

१९७५-७६ मा गढ़वाल भ्रातृ मण्डल द्वारा स्थानीय युवा-युवतियों की कला शाखा कू गठन करे गै जै मा सबसे बड़ो योगदान (स्व.) भुवनेश्वर जुयाल अर (स्व.) भगवान सिंह रावत कू छै। यों कलाशाखन ललित मोहन थपलियाल जी कू

एकांकी घर-जवै कू मंचन करे। ये का निर्देशक भुवनेश्वर जुयाल छ। अर मुख्य भूमिका मा दिनेश भारद्वाज अर सरोज बिष्ट छ। उत्तराखण्ड जन-कल्याण परिषद् द्वारा भी मुंबई मा "मलेथा की कूल" कू मंचन करै गे जै का लेखक जीत सिंह नेगी छन।

१९८६ मा गढ़वाल भ्रातृ मण्डल न् "तीलू रौतेली" नृत्य नाटिका कू सफल मंचन प्रसिद्ध सम्पूर्णानंद सभागृह मा करै। "तीलू रौतेली" की नाटकीकरण और गीत संवाद् की रचना दिनेश भारद्वाज न करै। नृत्य नाटिका कू निर्देशन भी दिनेश भारद्वाज अर उम्मेद सिंह बिष्ट न करै। करीब ४० कलाकारु द्वारा प्रस्तुत य नृत्य नाटिका मण्डल का इतिहास मा सफलत मंचन च।

१९८६ मा दिनेश भारद्वाज अर उम्मेद सिंह बिष्ट न "पलायन" नामक नाटक की रचना करे जो पहाडू से युवाओं कू पलायन पर आधारित च। गढ़वाल भ्रातृ मण्डल मुंबई न ये कू प्रस्तुती करण करे अर निर्देशक छ। उम्मेद सिंह बिष्ट।

गढ़वाल छात्र संघ मुंबई न भी अनेक एकांकियों की प्रस्तुति करे जै मा "बुढ़या लापता" प्रमुख च। यो मूलतः मराठी नाटक कू गढ़वलि रुपांतर च जो दिनेश भारद्वाज अर रमणमोहन कुकरेती न करै।

२००१-०१ मा एक दूसरो एकांकी "मुखत्या बुढ़या" कू मंचन गढ़वाल कला केन्द्र, जोगेश्वरी, मुंबई द्वारा करे गै। ये एकांकी का लेखक निर्देशक महाबीर सिंह बिष्ट छन। नाटक पूरी तरौ आधुनिक संस्कृति और गढ़वाल की पृष्ठभूमि पर व्यग्यं च। दर्शकू न यो नाटक बहुत पसंद करै।

मुंबई कू व्यापक क्षेत्र, व्यस्त जीवन का कारण अर नाटकों का प्रति समर्पित कला मंडलियों की कमी का कारण मुंबई कू रंगमंच ज्यादातर एकांकियों तक ही सीमित रै गै। गढ़वळि रंगमंच तै समर्पित गढ़वळि कलाकारु और रंगमंच-संस्थों की जगवाल च।



बागी उप्पन की लड़े

(गढ़वाळि साहित्य का मूर्धन्य कवि कन्हैयालाल डंडरियाल जी की कतनै उत्कृष्ट रचनाओं मा बटे एक कृति छ - "बागी उप्पन की लड़े"। तंगतंगा हालतुं का चलदा य रचना अभि तक अप्रकाशित छ। या उत्कृष्ट रचना लोगों का समणि आवा यीं कोशिश मा यीं कृति तै हम श्रृंखलाओं मा प्रकाशित कर्ना छं - सं.)

गतांक बटे अगनै:-

कबी पंखु की झपट मारि की,
बागी तै कै द्यो बेहोश।

जब तै सिंग रिंगावा बागी,
थप्पड़ उप्पन ल्हौ कै रोष।

बागी तै तब ग्वस्सा ऐ गै,
करि दे पूछ न मारइ मार।
पूछ रिंगै कै मार उप्पन फर,
झपगा ठोकि देन द्वी चार।

पंख टुटी गै तब उप्पन का,
ल्वै का छंछड़ा तब लागि गैन।

कतगै डाळा बोटा कूड़ा,
बोगी ल्वै की धारम् गैन।

मन चित दृढ़ कैरी उप्पन ना,
डाँग हाथ मा ल्यई उठाय।
मारी सिस्त लगै कै बागिदं,
और जोर से गरजी ग्याय।

भड़ उप्पन की गिरजाण से तब,
रौल्युँ पड़ि गै भारी गाज।
थरंट मचि गै तीन जोक मा,
सैत म प्रलय हून्दा आज।।

बाघ अटिगि गै रिक अटिगि गै,
हाथी झसगी गैंडा भाज।
कौबौ लागि गै बबर शेखु तै,
गर्म शेरजी गिरि गै आज।।

करप्यु लागि गै भग्गी पड़ि गै,
सैरा देश मुल्क का बीच।
अपणी अपणी पड़ी सब्युँ तै,
कै की सुधी कथी रै नी च।।

शेर लुकी गै घिडुड़ी घोलम,
सुरड़ी शेर, गुफौ लुकि गैन।

रिक लुकी गै मुसडुन्ड्युँ मा,
मूसा उतणढ़ण्ड ह्वै गैन।।

बादर गूणी गै ढड्युँ मा,
माछा डालौं मा चलि गैन।
बिरला ढाडू ट्वटगा ह्वै गै,
कुकर रूस्वड़ौं मा चलि गैन।।

बागि न रोके डाँग सिंगू मा,
और उप्पन फर झपटी ग्याय।
भटगा पड़ि गै द्वी ज्वानू मा,
भारी जबर लड़े मचि ग्याय।।

हार कबी खै जावा उप्पन,
कभी बागि खै जावा मात।
लड़दा लड़दा हुई इनी मा,
पूरा नौ दिन अर नौ रात।।

कतनै गैरी खाड खणे गै,
खुटौ नै धरती का बीच।
पसिना इतना छुटा लड़े मा,
घुंडु घुंडु की मचि ग्याया कीच।।

कड़गच कड़गच डाला टुटि गै,
फुटि गै भारी भारी पोड़।
भीड़ा उजड़ी, डैया टुटि गै,
मची लड़ाई छै जै छोड़।।

धरपट्टौ गदना ह्वै गै,
अर गदनौ मा ह्वै गै घर।
भेळू का वख सैणा बणि गै,
अर सैणौ का भेळ भंगार।।

जनी लड़ाई कैन अभी तै,
देखी और सुणी बी नी च।
मची लड़ाई इना जोर की
बागी और उपन का बीच।।



विशिष्ट सदस्य

- ◆ विजय धस्माना, जौली ग्राण्ट, देहरादून ◆ विरेन्द्र मोहन उनियाल, देहरादून
◆ अनिल मखलोगा

आजीवन सदस्य

सर्वश्री

1. रणवीर सिंह बुटोला, नई दिल्ली
2. उदय षंकर भट्ट, देहरादून
3. दिनेष जोषी, देहरादून
4. धीरेन्द्र देव सेमवाल, देहरादून
5. बुद्धि वल्लभ थपलियाल, देहरादून
6. हर्शमणी व्यास, देहरादून
7. सुरेन्द्र अग्रवाल, देहरादून
8. अरूण कुमार ढौंडियाल, देहरादून
9. बृजमोहन षर्मा, देहरादून
10. रविन्द्र सिंह नेगी, देहरादून
11. वीणा पाणी जोषी, देहरादून
12. आर.के. बहुगुणा, देहरादून
13. हेमवती नन्दन कुकरेती, देहरादून
14. एम.एस. पुण्डीर, देहरादून
15. एस.पी. ममगाई, देहरादून
16. सरस्वती गैरोला,ओ.एन.जी.सी.देहरादून
17. चन्द्रवीर सिंह नेगी, देहरादून
18. विजय सिंह नेगी, देहरादून
19. चित्रा रावत, देहरादून
20. एच.सी. जोषी, देहरादून
21. षिव प्रसाद उनियाल, देहरादून
22. त्रिलोक चन्द्र, देहरादून
23. किषोर कुमार, देहरादून
24. उमाकान्त डबराल, देहरादून
25. वी.पी. उनियाल ओ.एन.जी.सी, देहरादून
26. विरेन्द्र असवाल, देहरादून
27. वी.एस. पंवार, देहरादून
28. जे.एस. बुटोला, देहरादून
29. आर.पी. डोभाल, देहरादून
30. कुटज भारती, पौड़ी गढ़वाल
31. सर्वेष्वर प्रसाद सुन्दरियाल, पौड़ी गढ़वाल
32. प्रदीप सुन्दरियाल, पौड़ी गढ़वाल
33. भगवती प्रसाद नौटियाल, नई दिल्ली
34. संजय कुंडलिया, देहरादून
35. बृजमोहन षर्मा, नई दिल्ली
36. वेद प्रकाष खुगसाल, नोयडा
37. प्रतिभा नैथाणी, मुम्बई
38. विजय लक्ष्मी बमोला, नई दिल्ली
39. देवेन्द्र कैन्थोला, थाने
40. गिरीष ढौंडियाल, मुम्बई
41. रतन सिंह असवाल, देहरादून
42. जयदीप सकलानी, देहरादून
43. बी. बी. पुरोहित, कौलागढ़, दे.दून
44. चन्द्रपाल सिंह रावत, दिल्ली
45. पुरशोत्तम सुन्दरियाल, पौड़ी गढ़वाल
46. उर्मिल थपलियाल, लखनऊ
47. डा. उमा षंकर थपलियाल, श्रीनगर,
48. डा. ख्यात सिंह चौहान, संगलाकोटी
49. षिवचरण धस्माना, देहरादून
50. बी.एस. षाह पण्डितवाड़ी, दे.दून
51. जे0 एस0 नेगी, ढुंग, रूद्रप्रयाग
52. ओमप्रकाष सेमवाल,चोपता, रूद्रप्रयाग
53. सूर्यकान्त धस्माना करनपुर दे.दून
54. श्रीमती भाग्यवती नेगी, लक्खीबाग दे0दून
55. राजीव ओबरॉय, देहरादून
56. श्रीमती सुलोचना परमार, देहरादून
57. राजेश्वर उनियाल, मुम्बई
58. धनीराम बेलवाल, देहरादून
59. विनोद जोषी, देहरादून
60. बी.एम. एल. असवाल, देहरादून



ईगास-बग्वाल की हार्दिक
शुभकामनाओं का ढगड़

राजेन्द्र सिंह रावत

प्रधान ग्राम पंचायत टकारना
विकास खण्ड जौनपुर
टिहरी गढ़वाल

कार्यालय/निवास

ब्लेनिक इस्टेट,
नियर- कासमण्डा लोज
किताबघर, मसुरी
फोन न - 01376-224343

ग्राम- टकारना,
पो. ओ.झारणद
जौनपुर टिहरी गढ़वाल

ईगास अर बग्वाल की
शुभकामनाओं का ढगड़

बी० डी० शर्मा


अध्यक्ष, उचितदर दुकानदार संघ
एवम् मीडिया प्रभारी
अखिल गढ़वाल सभा, देहरादून

नेशाविला रोड़, देहरादून, उत्तराखण्ड

ईगास अर बग्वाल की
हार्दिक

शुभकामनाओं का ढगड़+

बीरेन्द्र मोहन उनियाल



झण्डा मौहल्ला देहरादून, उत्तराखण्ड

With Best Compliment From

Akshit Communication
&
Faith Properties

Pro. Sanjay Negi

Ladpur, Raipur Road, Dehradun (U.A)
Ph. 9897205335



हमारे चिट्ठी

